

Proveps-Knare Nomaniza

Knare Nomanizamofu Naneke

1 ¹ Ama avontafera knare nomanizamofu ke Israeli vahe'mokizmi kini ne' Solomoni, Deviti nemofo krente'ne. ² Ama knare nomanizamofu ke'mo'a, knare antahi'za neramino, tavumro ante ke nerasmino, taza hinketa oku'ama me'nea kea keta antahita hugahune. ³ Knare antahintahi neramino, tazeri fatgo nehanigeta, fatgo avu'ava nehuta, fatgo huta refko nehuta, maka vahe'mofona mago avamente knare avu'avara huzmantegahune. ⁴ Hagi ama ana nanekemo'a, antahi'zama'a omane'nesia vahera knare antahintahi nezaminkeno, ne'mofara antahiza nezaminke'za knare hu'za maka zana refko hugahaze. ⁵ Knare antahintahima eri'nesimo'a, ama nanekea nentahinkeno rempi hunemina, mago'ane ama' antahizana e'nerinkeno, antahi amama hania ne'mo'a, avumro kea erigahie. ⁶ Ama nanekemo'a zamaza hina, knare antahintahi eri kene, avame kea antahi ama nehuta, antahi'zane vahe'mo'zama hu'naza kene, ruzahu ruzahu fraki kea erigahaze. ⁷ Anumzamofonku kore hunteno agorga'a manizana, antahizama erizamofu agafa'a me'ne. Hu'neanagi neginagi vahe'mo'za knare antahi'zane avumro kegura amagena humigahie. ⁸ Mofavre'nimoke, negfama kavumro kema hania kea amage nentenka, negrerama repima hugamisia kea ha'ontagio. ⁹ Ana kavumro kemo'a, avasase zanu anunte fetori anteanzna nehuno, anankempi pasesu nofi anteanzna hugantegahie. ¹⁰ Mofavre'nimoke, kumi vahe'mo'za kefoza huogu kavazuma hanazana, ana kefozana osutfu huo. ¹¹ Tagrane egeta frakineta hazenkezmi omne vaheku ome zmahamneno hnagenka, ovutfu huo. ¹² Fri vahe kumamo'ma vahe'ma zamagahu nevazianzna huta, zamasmuma eri'za mani'naza vahera zmahe frisune. ¹³ Mika zgo'amo mareri zantamima zmaheta hnaresuna zantamina refko huta nontifi eri antevi'neteta, ¹⁴ musufama erisuna zgoa refko hugamigahunanki, tagrane enoma hanagenka, ¹⁵ mofavre'nimoke, zamagranena ovutfu huo, zamagrama vanarega ovuo. ¹⁶ Na'ankure ame hu'za kumira nehu'za, vahera zmahe'za korana eri neragize. ¹⁷ Nmamo negesigenka

krifu anaginte'sanana, ana namamo'a krifufina ohenigeno, krifumo'a amnezankna hugahie. ¹⁸Anahu kna hu'za, vahe'mo'za ruvahe zmahe'naku hazanagi, zamagra'a zamahe nefrize. ¹⁹E'inahu kanteti'ma mustufama fenoma erizamo'a, kahe frigahie.

Knare antahizamo'a, mago a' kna huno keza netie

²⁰Knare antahintahizamo'a mago a'kna hu'neakino, kama vu'za e'za nehazafi oti'nenno kezanetino, vahe atru hu'za nemanizafi ranke huno kezatino ke nehie. ²¹Ana a'mo'a tusi kereso nehaza kamofo atuparegati kezatino, rankumapi ufre kafante mni'nenno kea nehie. ²²Antahiza omane vahe'motma nama'a zupa musena hutma antahizantmi omane vahera manigahaze? Kiza zokago kema knare antahizanku'ma nehazana, taganetma omanigahafi? ²³Nagrama i'oma hugantoa kema amage'ma antesanke'na, nagu'a neramina, knare antahi'zani'a rempi huramigahue. ²⁴Hianagi kema nehugenka antahi nonaminka, kagrite etragote'za nehugenka antahi nonamine. ²⁵Kavumro'ma negantogenka, keni'a nontahinka, osuo huazama nehanku, ²⁶ana nona'a kagrite'ma esia hazenkegura, kagiza regahue. Tusi'a hazenke zamo kazeri kagateresige'na, Nagra kagiza regahue. ²⁷Zahoko'mo hiaza huno hazenke zamo'ma tmazeri agaterenkeno, hankro zaho'mo hiaza huno tinko'mo refitege, hazenke'zamo ene kore'zamo tmagritera egahie. ²⁸Ana hanige'za zamagra zmazama hanugura kezatigahazanagi, nagra kenona huozamigahue. Zamagra nagrikura hakre snazanagi, onagegahaze. ²⁹Na'ankure zamagra, antahi'zama erizankura zamesra hunente'za, Ra Anumzamofona kore hunte zamagesa ontahi'naze. ³⁰Nagrama zamavumro antoanke erinetre'za, zmazeri fatgo huankea amage onte'naze. ³¹E'ina hu'negu zamagrama hu'nesaza zamuzmamofona rga'a nesageno, oku'ma hu'naku retroma hu'nesaza zamavu'zmavamofona nona'a havi miza erigahaze. ³²Antahintahizmi omane vahe'mokizmia, neginagi zmavu'zmavamo zamahe nefrinkeno, knare hu'none hu'zama hanaza zamo, zamahe frigahie. ³³Hianagi aza'o nagri kema antahisimo'a, hazenke e'ori knare huno nemnino, havizankura korora osu mani fru huno manigahie.

Knare antahizamo'ma kaminia zamofo naneke

2 ¹Mofavre'nimoke, nagri kema antahinka kasege'nima eri kagu'afi nentenka, ²knare antahintahire kagesa neminka, kagu tumokareti hunka ama' antahizana e'nerinka, ³kagrama knare'zane havizanema refko hu antahintahigu'ene, ama' antahizanku'ma kezama netinka, ⁴silvagu'ma hiankna hunka knare antahizankura nehakrenka, marerisa zantami frakinte'nea zanku hakreankna hunka hakresunka, ⁵Ra Anumzamofoma kore huntenu agorgama manizana keama nehunka,

Anumzamofa antahi'zana hakrenka erifore hugahane. ⁶Na'ankure Ra Anumzamofa knare antahiza neramigeno, Agri agipinti antahi'zane, antahi amama huzamofa kea ne-e. ⁷Fatgo vahe'mofona knare antahiza ante avitenenteno, makazampima mani fatgoma huno mania vahe'mofona, Agra hanko zamigna nehie. ⁸Na'ankure Agrake fatgo vahe'mokizmia kama vano hu'zazmifina kegva nehuno, zamagu tumoteti hu'za amage'ma antaza nagara kavu'za zamifina zamagu nevazie. ⁹Ana nehunka fatgo avu'avazane, fatgo huno ke refkohu avu'ava ene, maka vahe'ma mago avamente avu'avama hunte'zana antahi ankeregahane. ¹⁰Na'ankure knare antahintahimo kagu'afi unefrenigeno, antahi'zamo'a, kazeri muse hugahie. ¹¹Knare antahizamo'a kva hugante'nenigeno, ama' antahintahimo'a kaguvazigahie. ¹²Knare antahizamo'a kefo avu'avazama nehu'za, akrehe krehe zmageruma neraza vahepintira, kaza huno kagu vazigahie. ¹³Iza'o fatgo avu'avamofa kama atremo'a, hani avu'avamofa kampi nevie. ¹⁴Iza'o knare osu avu'avama musema huno nehuno, akrehe krehe kefo avu'avazankuma muse nehimo'a, ¹⁵kama vu'zama'amo fatgo osu'neankino, havige vahe manine. ¹⁶Arumofa a'mo monko'za huno vano nehania a'mo, nagrane eno huno kazeri savri hu'naku hanianagi, ana knare antahintahi'zamo'a kahokeno kaguvazigahie. ¹⁷Ana a'mo nevena netreno, kahefazniare Anumzamofa avure'ma huhagerafina'a huvempa kea amefi hunemie. ¹⁸Na'ankure ana a'mofa nompima ufre'sanana, fri vahe'mokizmi kumate vu'nea kampi vugahane. ¹⁹Agrite'ma vimo'a eteno omeno, knare asimu eri kana onkegahie. ²⁰E'ina hu'negu knare vahe'mo'ma nevia kante nevunka, fatgo avu'avama nehia vahe'mofa kante vugahane. ²¹Na'ankure hazenkezmi omane vahe'mo'za ana moparera mni'nesage'za, makazampima mani fatgoma nehaza vahe'mo'za ana mopare manigahaze. ²²Hianagi kefo avu'avama nehaza vahe'mokizmia ana mopafintira zamazu hunetreno, fatgoma hu'za omanisaza vahera zamahe fanane hugahie.

Kasefa vahe'mokizmi naneke

3 ¹Mofavrenimoke, nagrama rempima hugamua kea kage'okanio. Hianagi kasegeni'a kagu'tumote erintegenomeno. ²Na'ankure kaza nehanigenka, karimpa frune zaza kafuzge knare hunka maninka vugahane. ³Atregeno vahe'ma knare kavukvama huntezamo ene, tamage avu'avamo'a katreno ovino. Hagi knankempi nofi kintegenomeno'ne'na kagu tumote avo krentegenomeno. ⁴E'inama hanankeno'a, Anumzamofene vahe'mozanena kavesineganteza, husga hugantegahaze. ⁵Anumzamofona mika kagu'areti hunka antahi'neminka, nagrani'a antahintahiretira makazana hugahue hunka osuo. ⁶Hanki mikazama hanampina antahiminka agihanta nevazigeno, vanana kana azeri ante fatgo hugantegahie. ⁷Kagraka'a antahizankura knare hu'ne hunka eri

antesga osunka, Anumzamofonku koro huntenka agorga'a nemaninka, havi avu'avazana kamefi humio. ⁸E'i ana'ma hanankeno'a, kavufa kazeri neganamreno, zaferina ka'a kazeri hanavetigahie. ⁹Feno zanka'anu'ene hozakafima pusama nenama hania nezanteti'ene Ra Anumzamofona aminka, agia eriantesga huo. ¹⁰Ana hanankeno Anumzamo'a kaza nehina nezama ante nonka'amo'a aviteno herafi neramina, waini tintafemofona kasefa waini timo aviteno tagiramigahie. ¹¹Mofavre'nimoka Ra Anumzamoma, kazeri fatgo hania kegura, kamefira huomige, kazeri fatgoma hunaku kazeri akorisiana karimpagna osuo. ¹²Na'ankure mago ne'mo'ma mofavre'ama avesima nenteno azeri fatgo nehiankna huno, Ra Anumzamo'a avesimantea vahera azeri fatgo nehie. ¹³Iza'o knare antahintahigu hakreno e'nerino, antahi ama'huzama erisimo'a, muse hugahie. ¹⁴Na'ankure ana knare antahintahimofona mizama'amo'a, silvaretima e'neriza zgoa agateneregeno, koliretima e'neriza zgoa, mago'ane agatere'ne. ¹⁵Knare antahintahimo'a mizama'amo mreri'nea havea agatere'ne, mago'a zankuma nentahinka kavesi kavesima nehana zantamina ageterene. ¹⁶Zaza knama maninka vuzamo'a, knare antahintahimofona tmaga azampi megeno, hoga kaziga azampina fenone, agi husaga hu'za me'ne. ¹⁷Knare antahintahimofo avu'avama huzamo'a, krimpafru nehunka muse hugahane. ¹⁸Iza'o ana knare antahintahima azerimo'a, asimu eri zafagna hu'neankino, agri avesizama azeri hampo'na hanimo'a muse hugahie. ¹⁹Ra Anumzamo'a knare antahi'zama'areti, ama mopamofa agafa'a erifore nehuno, antahi ama' hu antahizama'areti mona eri fore hu'ne. ²⁰Agra'a antahizanteti higeno timo'a mopa agu'afintira katati huno marerigeno, hampomo'a atakora nerie. ²¹Mofavre'nimoke atregeno knare antahintahizane, havizane knare zanema antahinka refkohu kavukvazana kagripintira fanane osina, kegva huo. ²²Hagi ana antahizamo'a kasimu kaminigenka zaza kna nemaninankeno, asunku'zamo'a knankempi kavasese huganteaza hugahie. ²³Ana nehunka kama vananana, kva hugantenkenka traka osunka, knare hunka vugahane. ²⁴Kavu'ma mase'sanana kore osunka, haga'nentake kavu masegahane. ²⁵Ame huno hazenkema esigenka kagra korera nosunka, kefo vahe'ma knazamo'ma azeri haviza hanigenka, korera osuo. ²⁶Na'ankure Ra Anumzamo kagrira kegva hugante'nesigeno, kagafina krifumo'a aze'origahie. ²⁷Kagrama azama huga kankamunte'ma mni'nesunka, atupama hu'nenaza vahera amane aza huo. ²⁸Tva'onkare nemni'simofona amigama hu'nesunka, oki ege'na kami'nenno hunka osuo. ²⁹Tva'onkare nemnisaza vahera hazenke zamikea retro osuo. Na'ankure kagrikura taza hugahie hu'za antahinegamize. ³⁰Kegafa'a omaneno, mago kefozama huogante'nesnigenka, mago nera azerinka keaga huonto. ³¹Hazenkema hanaza vahe'mokizmi zamavu'zmavakura kegasane nosunka, zamagrama hanaza zamavu'zmavara osuo. ³²Na'ankure Ra

Anumzamo'a akrehe krehe znavu'zmava'ene vahekura avesra huno agote'nezmanteno, fatgo znavu'zmavama nehaza vaheku avesi'nezmante. ³³Kefo zamavu'zmavama nehaza vahe'mokizmi naga'zmimofona, Ra Anumzamo'a kazusi hunezmante. Hianagi fatgo ne'mofo nagapina asomu hunezmante. ³⁴Vahe'mokizmima azanava kema huzmante vahe'mofona, Ra Anumzamo'a agri'enena azanava ke huntegahie. Hianagi anteramino manimofona, asunku hunente. ³⁵Knare antahizane vahe'mo'a, ra agi erigahianagi, neginagi antahizane vahe'mo'za, zamagazegu hugahaze.

Kasefa ne'mofa'mofo zamavumro naneke

4 ¹Mofavre naganimote, negafanama rempi hugamisua kavumro kema kagesa antahi ankere'sunka, antahi ama' hu antahintahia erigahane. ²Nagra knare antahiza negamuanki, rempi hugamisua kea kamefi huonto. ³Nagrama nenfa nompima onensa mofavre mni'norera antanimofa magoke mofavre'a mani'nogeno kegva hunante'negeno, ⁴amanage huno nenfa'a rempi hunamine, mika kema kasamisua kea kagu tumote erintenka azeri hampo'na nehunka, kasegeni'a amagama antesunka, knare hunka manigahane. ⁵Knare antahintahia erio, antahi amahu antahi'zana erio, kasamisua nanekea kagera okaninka, kamagena huontetfa'za huo. ⁶Knare antahintahimofoma kamage'nama huonte'sankeno'a, kagu nevazina avesima ante'sankeno'a, kegva hugantegahie. ⁷Knare antahintahi'zana raza me'neanki erio. Hagi makazana erigahananagi agatere'neazana knare antahiza erio. ⁸Knare antahintahi zana azerisga nehugeno, kagrira kazeri sga hino, agri'ma azeri akonama hanankeno'a, kagrira kazeri sga hugahie.

⁹Ana antahizamo'a, rimpa fru'zanu konariri kasenire huneganteno, kinimofa asinentike fetori kasenire resi hugantegahie. ¹⁰Mofavre nimoke, nagrama huankema antahitenka, ana kema avaririnka amage'ma antesunka, rama'a kafuzge maninka vugahane. ¹¹Knare antahi zampi vuogu nagra kazeri fatgo nehuna, knare fatgo kante kavare'na nevue. ¹²Ana kantema kagama renake'renka vnanana mago zamo'a asevazi ogante'na, traginaku'ma hananana tanafara osugahane. ¹³Kagrama hananegu'ma amama kasamua kea otrenka azeri hanavenetinka atregeno ovino. Na'ankure e'i ana kema huoguma rempima hunegamua kemo'a mani'zanka'agna hugahie. ¹⁴Havi kefo avu'ava hania vahe'mofo kantera ovunka, haviza huno kefoza hu'nenia vahe'mo hania zana ovaririo. ¹⁵Ana kantera ovunka, atrenka rukagesenka vugahuema hantega vuo. ¹⁶Na'ankure zamagra kefo avu'ava zama osu'nesu'za zamavura ovase'za manine'za kefozana hute'za zamavura masegahaze. Vahera zamazeri haviza hutesuzage, zamavura vasegahaze. ¹⁷Kefo avu'avama hu'zana, breti neankna nehu'za, hazenkema huzana waini ti neza negi neankna nehaze. ¹⁸Hianagi fatgo vahe'mofo manizamo'a, zgemo zahufa nehnatino

remsa hume ne-eno, eme remsa huno feru aseankna nehie. ¹⁹Hianagi havi avu'ava ene vahe'mofo mani'zamo'a, hani hiankna hu'neankiza, ana vahe'mo'za na'amo zamazeri tanafa nehie nonkaze. ²⁰Nagrama huankere mofavrenimoka kagesa antenka, mika keni'a antahi ankeru. ²¹Hagi ana nanekea kavure antenka negenka, ana mika kea kagu'afi erintenka kegva huo. ²²Na'ankure iza'o ana kema erino agu'afima antemofona, manizama'amo'a knare hanigeno, mika avufgamo'a knare hugahie. ²³Ana mikazana hugahananagi agatereneazama hananana, antahi zanka'a kvahu so'e huo. Na'ankure e'i tamage asimu eri tinkampui me'ne. ²⁴Havigema huzana netrenka, krunagama kagipintima atirami'zankura atregeno afete meno. ²⁵Kavua kegantigama osunka, ke fatgo hunka kavugage kavua kenka vuo. ²⁶Kagama rentenkama vanana kana kva hu'nenka, kavua kenka nevugeno, mika zamo'a kagriteru agafa huno eme hanavetigahie. ²⁷Kagia antifi omerege amafi emerege osunka, kagamoma kefo avu'avapima kavareno vuzankura kva huo.

Savari a'ene monko avu'avaza hu'zanku kva hanuna tavumro naneke

5 ¹Mofavrenimoke, knare antahi'zane ama' antahizamofu kema kasamisua kagesa antenka antahi so'e huo. ²Anama hanunka ama' antahintahire nemaninka, keagama hananana antahintahine vahe'mo'za nehazankna hunka kea hugahane. ³Na'ankure savri a'mofo agipinti kemo'a, tume rima'amo haga hiankna nehinkeno, agipintima atiramisia nanekemo'a, olivi masavemo fru huno karoro hiankna hugahie. ⁴Hianagi refaregama kesana, ana amo'a akahe trazankna nehuno, tare kaziga asane'nea kazinkna hu'ne. ⁵E'i ana a'mofo agamo'a fri'zampi uneramino, agama renakereno viazamo'a, fri vahe kerifi nevie. ⁶Ana savari a'mo'a, asimuma erino mani kankura nontahino, kama via kamo'a fatgoa nosianagi antahino keno nosie. ⁷E'ina hu'negu mofavre nimota kenia antahitma, amama tamasamisua kemofona tamagena huomiho. ⁸Ana savari a'mofona atrenka ogantu'a nemaninka, nomofo kasama'arera uravao osuo. ⁹Anama hananana havi kagi e'nerinka, zahufafi kasefa vahe mani'nesanke'za, havi vahe'mo'za kazeri haviza hugahaze. ¹⁰Onke'nesana vahe'mo'za hanaveka'a atrenka eri'nanazana, e'nerisageno, knare zantamima amuhu hunka eritru hunte'sana zantamina ru vahe'mo'za erigahaze. ¹¹Henkama frinaku'ma hanana knama esigeno'a, krimo'a kavufafina ra nehuno, kazeri zaferinage hinkenka karagi nerunka, ¹²anage hugahane, na'a higena navumaro kema nenasimige'na, nagokura hu'na navesra hunentena, nazeri fatgo nehigena, ana kea ontahi'noane hugahane. ¹³Nahige'na rempi hunami vahe'mo'zane, nazeri kante ante kema nasami'za vahe'mokizmi kea ontahi'noane hunka hugahane! ¹⁴Nagra mika vahe zmurera haviza hu'na keforoe hugahane. ¹⁵Ru vahe'mofo tintetira tina ono, kagra'a tintetike tina no, e'i a'ka'ane

mani fatgo huzanku hu'ne. ¹⁶Amanefina tinka'a ome tagi atre, eme tagitre osuo. Kagra a'enenke'za maso. ¹⁷Atregeno kagri a'mofo suzanke meno, aru a'nenena monkozana osuo. ¹⁸Kasefama maninenka e'rinana a'ka'ane muse hunka mani'negeno, Anumzamo'a asomu hugantegahie. ¹⁹A'ka'amo'a dia a' afu'moma hiankna huno avesi avesi huno knare zantfa huneganteanke, amima'amo'a maka kna kavesizana kazeri knare nehina, kagrma kavesi kantenia zamo'a kazeri agrarega atrena agri avesizampi manigahane. ²⁰Neve enema mani fatgo hunoma omanisia a'nea mofavre'nimoka ke'negeno kavufgamo'a oraotino. Atregeno amima'arera kavrenteno kanura okino. ²¹Na'ankure Ra Anumzamo'a miko kama vano hunana, ke'anckereno refako huno tage'negeta vano nehune. ²²Kefozama nehia ne'mofona kefo avu'avazama'amo'a kukomo azeriankna nehigeno, kumi'amo kina rentegeno nemani'ne. ²³Agra'a avesizama kegvama osaniazamo hanigeno frigahie. Rama'a havizama haniazamo hanigeno, fanane hugahie.

Mago'a kavukavama osnana zamofa nanenke

6 ¹Mofavrenimoke, tva'onkarema nemanisimo'ma nofi hugahue hanigenka aza hugahue hananano, rumofonku'ma huvempa hunka kaza hugahuema hananana, ²kagraka'a huvempama hu'nenana kemo kinama regatenigenka, ³mofavre'nimoka amana huo, hago agri azampi mani'nananki kagra'a kavufa anteraminka ana nete vunka, kasunku naneke ome hugeno kina reogantena amne manigahane. ⁴Kavu tokora osunka, kavura omasenenka, ame hunka vuo. ⁵Kagra dia afumo'ene namamo enema zgagfama ahe vahe'mofo azampinti ame huno freankna hunka, kagra'a kavufga kaguvazio.

⁶Eri'zama e'ori feru vahe'motma kipazuvemoza nehaza zante ome negeta, rempi huta nentahita, knare antahizana eriho. ⁷Kipazuvemofona kva vahe'zmia omanigeno, zamazeri ante fatgohu kva vahe zamia omanigeno, kvama krizamante kva vahe zamia omani'neanagi, ⁸ne'zamo'ma rama'ama fore hianknafina nezama omane knafima nesagura, nezana eri atru nehaze. ⁹Eri'zama e'ori feru vahe'motma, nama'a zupa tamavura masegahaze? Nazupa masetamavuna segahaze? ¹⁰Osiagna ko kavura masenka hinkrafora antegenko, osiagna ko mago'ane manifru nehunka, osiagna ko mago'ane kagemazampare kazana antenka manifru hananana, ¹¹mago zanka'a omanetfa hanigenka, kumazafa vahemo atireti kazerino fenozanka'a erivgareankna hugahane. ¹²Mago zazmi omane kefozama nehaza vahe'mo'za akrehe krehe zmageru aruza vano nehaze. ¹³Ana vahe'mo'za havigema nehanuza zamavu resukinegamiza, zmagiareti rekapasga nehu'za, zmazanteti ene erigu'a hu'za avame'namera hugahaze. ¹⁴Havi avu'avazama erifore'ma hu'zamo zamagu'afina avitenege'za, kefo avu'avazana hakare zupa nehu'za,

hazenkea eri hakare hu'za nevaze. ¹⁵E'ina hu'negu e'inahu vahetera hantka huno havizamo'a agritera eno, ame huno azeri haviza hanigeno, anama azeri havizama hania knazama eritre kana omanetfa hugahie.

Seveni'a avu'avazama Anumzamofoma ago'ma netea zamofa naneke

¹⁶Sigisi'a zama Ra Anumzamo ago'matenentea zantami me'neanagi, seveni'a zamo'a Ra Anumzamofa avurera kasrino haviza me'ne.

¹⁷Agra avufga erisga nehuno, ru vahe kafenkami atre'zane, havigema hu'zane, hazenke'a omane vahe'ma aheno korama'a eri fegi atre'zane, ¹⁸havi antahintahizamo antahintahifima mevite'zane, havi zante'ma ame huno avreno neviazane ave'nosie. ¹⁹Keagama refkohu trate osu'nea zanku tamage nehie huno havige hu vahe'ma, zamagipintima krunagema hu'zama atineramia zane, naga'afima hazenke zama eri hakare nehiazana Anumzamo'a agonete. ²⁰Mofavrenimoke, negfa'ma kasamisia kasegea otretfa nehunka, negrera'ma rempi hugamisia kea amge'anto. ²¹Kagu'afi erintenka azeri antakro maka zupa nehunka, avaseseza hiankna hunka rugaginka knankempi anakio. ²²Kama vanoma hananana ana kemo kazeri fatgo nehuno, kavu'ma masesanana kegva huneganteno, masenesampintima oti'sanana nanekea kasamigahie. ²³Na'ankure ama ana kasegemo'a rampe tavikna higeno, amama rempima huneramia kemo'a msa megeno, kazeri fatgohu kavumroma antea kemo'a, manizamofa ka me'ne. ²⁴Savri a'nemo'za kazeri hava huzankura ana kemo kza nehina, neve'enema mni fatgo osu savari avu'avazante vanoma nehania a'mofa haganentake ageru'mo'a kazeri havizana osugahie. ²⁵Ana a'mofa agi agonagura kegasanea osuge, atregeno kavazu hunaku'ma avuretima revumima hugamisia zamo'a kavazua osino. ²⁶Na'ankure savri a'enema mase zamo'a kazeri kefo regahianagi, vereti a'mo'ma kavazu haniana kasimu ka'a erigahie. ²⁷Akru huno neresia tevema hankeri kasumpima antesanana kukenaka'a azerino onteghahifi? ²⁸Teve zugu'ma neresifima kaga vapama vananana, kagagusa teonkasagegosifi? ²⁹E'ina hukna hugahane, tava'onka'arema nemanisia ne'mofa a'enema masege, monkozama hananana hazenke erigahane. ³⁰Aga'ma netenigeno nezama nesia zankuma kumzafama erisia vahera, rama'a tamarimpa kna hunontaze. ³¹Hu'neanagi ana ne'ma azerisageno'a, seveni'a zupa nama'aza eri'neo seveni'a zupa antegofetu huno miza segahie. Hagi upama hanuno'a, no'ma'afima ante'nesia fenoma'areti ene mizasegahie. ³²Hianagi ru ne'mofa a'enema maseno monkozama huntesia ne'mo'a, ana negi' avu'ava zama'areti agra'a azeri haviza nehie. ³³Ahe'zama azeri agazema huntesa zamo'a, agrite me'nesigeno agaze zamo'a vgaore agrite mevava hugahie. ³⁴Na'ankure ana a'mofa neve'ma rimpama ahesia zamo marerisigeno nona huno kahenaku esiana asuntagizana agripina omanegosie. ³⁵Ana hazenkere miza antege, rimpa azeri fru hu'naku rama'a zantami eme amisia zamo'a, azeri fru osugahie.

Savri a'mofonku'ma mani korema hu'zamofu naneke

7 ¹Mofavre'nimoke, keni'a nentahinka, kasegeni'a eri kagu'afi antegeni raza segantena kva huo. ²Kasegeni'ama amage antesanana kagra kasefa hunka nemaninka, rempima hugamisua zana kavurgama kegva nehanankna hunka kegva huo. ³Kazeri kagesa hanigu rini kazampi antaniankna hunka kantu kagu'afi tumoka'are krento. ⁴Knare antahintahigura nensaro'e nehunka, antahi amahu antahintahigura nenafu'e hunka huo. ⁵Ve'ama maninesia a'mo'ma kazeri savrima hu'zama nehinkeno'a, ana kemo'a kaza nehina ru kazigati a'mo'ma kazeri savri hunaku'ma masavenke'ma nehanigeno'a, ana kemo'a kaguvazigahie.

⁶Mago zupa mani'ne'na noniamofona zaho eri kampinti negogeno, ⁷mago'a nehazave enevazafina kogeno amuno zamifina, mago nehaza ne'kanora, knare antahizama'a omanenea ne' ke'noe. ⁸Agra monko'amofu nontava'onte vu'nea nonkaranka nevuno, ana a'mofu nonte vu'nea kampi ufreno vu'ne. ⁹Hanima hukuma nehigeno, hanimo'ma rentrako huzahifi ana hu'ne. ¹⁰Ana a'mo'ma kukenama hu'neana monko a'nemo'za nehazankna kukena hu'neni, ana ne'ma masavenkema asamino azeri savrima hanigura e'ne. ¹¹Ana a'mo'a kehagra hagra nehuno, nontera manirava oheno kankekanke nehigeza, rama vahe'mo'za ke'za antahiza hu'naza are. ¹²Ana a'ra hakarea zupa kampine, maketi kumapine, maka kaziga manineno venenema evazageno rezamaheno zamavazuma hanigu negea akino, ¹³ana nehaza nera azeri anukiazamo antako hunteno, avufga azeri otiare avunutira negeno anage hu'ne, ¹⁴nagra menina narimpa fruma eri kresramana vugeno, huvempama huntenoa kemo'a raga re'ne. ¹⁵Hu'negu kagriku hakarena kagenaku oregati hago eme kagena eri forehue. ¹⁶Isipi vahe'mokizmi pse'ane tavravereti mase tafera hunte'noe. ¹⁷Hago knare manama vuzantami miama, aloima, sinamoninu mase tafepina rutri huna ahemna vunte'noe. ¹⁸Hagi egeta umaseneta, zokagora nereta musena nehanukeno ko'aturanteno. ¹⁹Nenave'a nontera omani'neanki, hago afete ka vu'ne. ²⁰Zgomo'a ku'afina avitenegeno vu'neankino kora omegosianki ama ikamofona amunontega esia kante vu'ne. ²¹Ana a'mo'a masave kema asamino avresia nanekea, rama'a naneke asamine. ²²Ana ne'mo'a ame huno ve bulimakao afu aheku avazu hu'za nevazankna huno ana a'mofona avaririno vu'ne. ²³Kevemo'ma tumo'ruragino ahesnia zankura agesa ana ne'mo'a nontahino, agra namamo hareno krifu anagintepi ufreankna nehuno, ahe frisia zankura nontahie.

²⁴Hanki mofavre'nimote, tamagesa anteso'e hutma nanekeni'a antahiho, ²⁵Atrenkeno tamagu'amo'a ana a'mofu kerera amagera ontege, kavareno agri kantera ovino. ²⁶Na'ankure ana a'mo'a rama'a venene zmazeri haviza nehuno, zamahe fri'ne. ²⁷Hagi ana a'mofu nona fri vahe kerimofu ranka me'neankino, ana kamo'a fri vahe kumapi uramine.

Knare antahintahimo kezanetia naneke

8 ¹Knare antahintahizamo ene antahi ama'hu antahizamo'a mago a'kna hu'neankino agerura eri antesga huno kezana netie. ²Agra kamofa tavaonte me'nea agonare, ka hatana hu'nefi otine'no, ³rankumapi ufre'nea kante ene kampi otineno ranke huno kezana netie. ⁴Ana miko vahe'motmagu kezanke nehue. Vahe'motagu kezanke nehue. ⁵Antahizantmi omane vahe'motma eta refakomahu antahizana emerihio, neginagi antahi'zane vahe'motma, eta antahi amahu antahi'zana emerihio. ⁶Kma antahiho kema nehuana, na'ankure mareri agatere'nea zanku nehue, maka nanekema hanua kemo'a, fatgo huno tamage ke tamamigahue. ⁷Nagra tamage kege nehu'na, havi kegagama nagi'pintima huzankura nagonete. ⁸Maka nanekenimo'a tamage huno fatgo higeno, krunagene kazaki kema huzana omane'neanki, ⁹ana maka kemo'a antahizane vahetera fatgo hu'ne. Ana antahizama erinaku'ma hakaza vahetera, fatgo hu'ne. ¹⁰Nagrama hiho hu'nama rempima huneramua kemo'a, silva agateregeno, antahizama erizamo'a, koli'a agatereneanki erio. ¹¹Na'ankure knare antahi'zamo'a mareri agaterenea havea agatereno, kavesi kavesima nehunka razane hunka nehanazana agatere'ne. ¹²Nagra, knare antahi'zamona knare huno refakohu'zane nemanue, Nagripi antahizana me'neankina miko zana nagrake refko hu'na negoe. ¹³Ra Anumzamofonku koroma huntezana kefo avu'avama huzankura kagotegahie. Agra'a agima erisga nehuno, avufga ra nehuno, havi avu'ava nehuno, akrahe akrehe ageru'ma aru'zana navesra hunentoe. ¹⁴Knare antahizama ami'zane, refakoma huzana nagripi me'ne. Nagra antahi ama'ma huzane hanavenena nagri zane. ¹⁵Nagra maninoge'za kini vahe'moza kegva nehazageno, ugota kva vahemoza fatgo hu'nea kasegea retro nehaze. ¹⁶Kva vahe'mo'za nagra zamaza nehuge'za vahera zamavre fatgo huza ne'vzageno, trakere kva vahe'moza fatgo huza refkoa nehaze. ¹⁷Iza'o nagrima avesi nentemofona, nagra avesi nentoe. Hagi nagri'kuma hakre'nimo'a, nagrira nagefore hugahie. ¹⁸Nagripi fenozane, ra agima erizana me'ne. Hanavetino zazatema meno vu fenozane, fatgo avu'avazana nagripi me'ne. ¹⁹Nagrama nezamua zamo'a, golia agatenereno knare silvama mizama nesazazana agaterene. ²⁰Nagra fatgo avu'avazamofa kante nevuna, fatgo huno refakoma huzamofa kantamimpi nevue. ²¹Iza'zo nagrima zmavesi nantesaza nagamo'za, fenona erisanti neharesagena, nagra feno nozamifina zago'amo mareri zantamina antevi tezamantegahue. ²²Ra Anumzamomo'a pusazana nagri nazeri fore huteno, mika'zana henka tro hu'ne. ²³Korapara ama mopama tro osuneno ese zana nagri huhamprinantene. ²⁴Nagra fore hutogeno henka hagerina tro higeno, kampui tintamimo'a hanatino vu'ne. ²⁵Ranra agonane, onensa agona forera huno menima antenerera omanenegena,

nagra pusante fore hu'noe. ²⁶Miko mopane, hofa kokama ama mopafi kugusopa nazana henka tro hu'ne. ²⁷Nagra korapa maninogeno monarera mikazana tro hunenteno, hagerina tro huntengeno tavumoma ometre emetretera evune. ²⁸Nagra ko maninogeno anagamua hampona tro hunenteno, tinkampuima hanatino tiruma umarenia keria tro hune. ²⁹Nagra korapa maninogeno hagerinkura, e'i avamente tirura marenka emetro huno kase hunenteno, tiruma maresia mopa trohune. ³⁰Nagra makazama tro'ma hu'noa Ne'mofo tavaonte mani'nena, aza nehugeno muse nehigena maka kna nagra nena rama'a muse nehue. ³¹Maka kokama troma hu'nea zanku'ene vahe'ma anampima mani'nea zankura, nagra tusi'a muse nehue. ³²E'ina hu'negu mofavre'nimoka ke'ni'a antahinamio, na'ankure nagri navu'nava zama avaririsaza vahe'mo'za muse hugahaze. ³³Kavumroma antesua kea nentahinka, ama antahizana e'nerinka kavesra huontenka amage anto. ³⁴Ke'ni'ama nentahiza, kumanimofo kama atiramitema knane knanema naveganenteza, kahani'arema navegama nentaza vahe'mo'za, tusi muse hugahaze. ³⁵Na'ankure nagriku'ma hakremo'a, nomaniza hakeno erifore nehigeno, Ra Anumzamo'a avesinente. ³⁶Hianagi ha'marenteno kumi'ma nehimo'a, agra'a hazenke enerie. Iza'o avesrama hunantemo'a, frizamomofo avesinente.

Knare antahizamo'a vaheku kezati'nea naneke

9 ¹Knare antahizamo'a mago a'kna hu'neankino noma'a negino, 7ni'a noma azeri oti zafa antreno erisoe nehie. ²Hagi ana a'mo'a ra neza retro nehuno, waini tina tro huno nenteno, nezama ante trara retro huntene. ³Ana huteno eriza a'ne'a, vahe ome kehihogu hunezamanteno, agra rankumapina marerisga hunereti kezana atino, ⁴tamagi omane vahe'motane refakoma hutama kezampima atupama hu'nesamota, ⁵rukrehe huta nagrite etma ne'zana eme neneta, waini tima tro'ma huntenoana eme neho. ⁶Hagi neginagi kavukavama nehanazana netrenka nomanizanka'a agafa hunka erintese nehunka knare antahintahizana rempi hunka nentahinka anazana hunka vuo. ⁷Azanava kema hu vahe'mofoma azeri fatgoma hananana, kema asamisana kegura huhaviza hugantegahie. Kefo avu'avama nehanimofo azeri fatgo hu kema hananana, ana kegura kiza zokago ke hugantegahie. ⁸Ana hu'negu azanava ke'ma nehia vahera azeri fatgo osuo, avesra hugantegahie. Ama' antahizane vahe'ma azeri fatgoma hanankeno'a, avesigantegahie. ⁹Ama' antahintahine vahe avumrora nentegeno mago'ane antahintahifina, ama huno manino. Fatgo avu'ava zane ne' rempi hunemigeno antahintahi'afina mago'ane antahizana erino. ¹⁰Ramofoma koroma hunteno agorga'ama manizamo'a, knare antahizamomofo agafa me'ne. Ruotage'ma Hu'nemomofo kagra antahi ama'ma hananana, ama' antahiza erigahane. ¹¹Na'ankure knare antahizamo'a huno, nagriteti zazakna nemaninka mago'ane

rama'a kafu manigahane hune. ¹²Kagrama ama' antahizama erisanana, knare antahizamo'a, mizama'a kamigahie. Kagrama kiza zokagoma huntesanana kagra'a haviza hugahane. ¹³Neginagi avu'avama hu'zamo'a mago a'mo rankege nehiankna hu'neankino, ke antahizama'a omanegeno, antahintahizana agripina omanene. ¹⁴Agrira noma'amo'a rankumamofona mesga huno me'negeno kahama'are manineno, ¹⁵zamagra'a erizante'ma vu fatgo huza kantema agatere'za vu'za e'zama haza vahekura, kezatino kea huno, ¹⁶atrenke'za zamagi omne vahe'mo'za rukrahe hu'za eho, nehuno refko hu'zama ke ama' osu'naza vahe'mokizmigura kea nehie. ¹⁷Kumzafama asenana timo'a knare haga hugahie. Hagi ne'zama kragragu oku'ama ne'nana ne'zamo'a haga hugahie. ¹⁸Hianagi fri'za me'ne hu'za nontahiza, ko'ma ana a'mofonontegama vu'naza vahe'mo'zama fri'naza zankura nontahize.

Solomoni knare antahizamofonaneke

10 ¹Solomoni knare antahintahi zamofonaneke, erikofa huno krente'nea naneke. Ama' antahintahine mofavremo'a, nefana azeri muse nehie. Hianagi neginagi antahintahine mofavremo'a, nererana rimpa erihaviza higeno, asuzampi nemanie. ²Havi kazigatima erisana feno zamo'a kaza osugahianagi, mani fatgoma hunka manizamo'a, fri zampintira kagu vazigahie. ³Fatgoma hunoma nemanie vahera, Ra Anumzamo'a atregeno agazankura nosie. Hianagi fatgo osu'zama haza vahera, zamatrenige'za erinaku'ma maragu'zama netizazana e'origahaze. ⁴Feru'ma maniza vahe'mokizmia zamuntera nomane. Hianagi amuhoma hu'za erizama erizamo'za, rama'a fenoza nentaze. ⁵Ama' antahizama eri'nea vahe'mo'a, nezamo'ma nenama hianknafina, ne'zana eritru nehie. Hianagi ne'zama hamareno eri atruhu knafima, avu'ma masea vahe'mo'a agazegu hugahie. ⁶Fatgo vahe'mokizmia zamasenirera asomu'mo'a, kini fetori antani zamante'ankna nehie. Hianagi kefozama nehaza vahe'mokizmi kemo'a, hazenkezana refinete. ⁷Fatgo vahe'mo'zama ko'ma knare zama hu'naza zankura, vahe'mo'za antahinezmiza muse nehaze. Hianagi kefo zama nehia vahe'mofona, agi agenke'a omanegahie. ⁸Ama' antahintahine vahe'mo'za, eri'za kea nevaririze. Hianagi tavare vahe'mo'za, haviza nehaze. ⁹Iza'zo mika zampima mani fatgoma haza vahe'mo'za, knare hu'za nemanize. Hianagi fatgo zama osnimo'a, fra'okigahie. ¹⁰Regavumi kavami huzamo'a, hazenke eri kamigahie. Hagi tavre vahe'mo'za zmagra'a haviza hugahaze. ¹¹Fatgo vahe'mofo zamagipintima atiramia kemo'a, asimu ami tinkapui'mo atiramino eankna nehie. Hianagi kefozama nehaza vahe'mokizmi zamagipintima atiramia kemo'a, hazenke zana refinete. ¹²Vahe'ma antahi havizama huzamo'a, ha' fra hu'za eri fore nehie. Hianagi vahe'ma avesima ante'zamo'a, miko kefozana refinete. ¹³Knare antahizamo'a knare'ma huno refkomahu vahe'mofo zamagi'pinti

atineramie. Hianagi knare antahintahi omane vahe'mofona zmgumpi sefu amigahaze. ¹⁴Ama' antahizane vahe'mo'a, antahi'zana erite erite huno, rama'a enerie. Hianagi neginagi kema haza vahe'mo'za, mika zankura upa nehu'za, ame hu'za haviza hugahaze. ¹⁵Feno vahe'mokizmi feno zmimo'a, vihu huzmanteankna hugahie. Hianagi zamunte'ma omaneazamo zamunte omane vahera zmazeri haviza nehie. ¹⁶Fatgo zamavu'zamavama nehaza vahe'mokizmia mizazmia, knare nomaniza erigahaze. Hianagi kefozama nehaza vahe'mo'za, havi miza erigahaze. ¹⁷Avumro'ma anteankema antahimia vahe'mo'a, knare nomaniza eri kante nevie. Hianagi zamazeri fatgoma hazanke'ma zamavesrama huntaza vahe'mo'za, havifi nevaze. ¹⁸Rimpa knama hu'nea vahe'mo'ma ana rimpa knama refitenakura, rama'a havige nehie. Hagi vahe'mokizmi zamagenkema hu vahera, neginagi vahere. ¹⁹Rama'a kegagama huzamo'a, kumipi kavareno nevie. Hianagi iza'o agefu'nama kegavama himo'a, ama' antahizane vahe manine. ²⁰Fatgo vahe'mofo kemo'a, knare silvagna hu'ne. Hianagi havi vahe'mokizmi antahintahimo'a, haviza huno mago kna'a omanene. ²¹Fatgo vahe'mofo kemo'a, rama'a vahe zamazeri hanavenetie. Hianagi neginagi vahe'mo'za antahi ama'hu antahintahigura upa hu'za nefrize. ²²Ra Anumzamo zamazeri feno vahe nesea asomumo'a, asunkuzana eri ozamigosie. ²³Neginagi vahe'mo'za, kefo avu'avazana kiza zokago hazankna hu'za nehaze. Hianagi ama' antahintahine vahe'mo'za, knare antahintahifi muse hu'za makaza nehaze. ²⁴Kefo vahe'mo'zama koroma nehazazamo'a, zamagrite egahie. Hianagi fatgo vahe'mo'za zmave'ma nesiazana erigahaze. ²⁵Kefo avu'avazama nehaza vahe'mokizmia unu ko'ma atuno esuno'a, zamavreno fregahie. Hianagi fatgo vahe'mo'za oti hanavetiza, manivava hugahaze. ²⁶Feru vahe'ma eri'za erinogu'ma huntesanana, ana vahe'mo'za aka'zamo vahe'mokizmi zamagipi ufreno akahiankna nehu'za, tokimo vahe'mokizmi zamavurgafi ufareno aka heankna kagriteri hugahaze. ²⁷Ra Anumzamofoma koroma hunteno agorga'ama manizamo'a, zaza kafuzge manigahane. Hianagi kefozama hu vahe'mokizmia knazamia erikofa hinke'za, zazatera omanigahaze. ²⁸Fatgo vahe'mo'zama amuhama nehaza zamofona nena'a musezane. Hianagi havizama nehaza vahe'mozama amuhama nehazazamo'a amene zankna hugahie. ²⁹Ra Anumzamofoma avu'avazamo'a fatgo vahe'mokizmi, vihu huzmanteankna hu'ne. Hianagi havi avu'avazama nehaza vahe'mokizmia, zamazeri haviza hugahie. ³⁰Fatgo vahe'mokizmia zamazeri torera osugahie. Hianagi havi zmavu'zmavama nehaza vahe'mo'za, ama'na mopafina omanigahaze. ³¹Fatgo vahe'mofo agipintima atiramia kemo'a, knare antahiza atiramino nevie. Hianagi akrehe krehe ageru'ene vahe'mofona azeri taganegahie. ³²Fatgo vahe'mofo zamagi'pintira vahe'mokizmi zamazahu naneke atineramie. Hianagi kefo vahe'mokizmi zamagi'pintira, akrehe krehe kemo atineramie.

Fatgo zane havi zanemofo naneke

11 ¹Havizama huno avamente'ma refkohu so'ema nosia vahera, Ra Anumzamo'a agoteno avesra hunente. Hianagi avamente'ma fatgo huno mizama asea vaheku avesinente. ²Kavufga atarezamo'a, kagaze'za erigamigahie. Hianagi kavufga anteramizamo'a, knare antahintahiza erino egahie. ³Maka zampima tamage huno fatgo avu'avama hanimofona, ana avu'avazamo kegva huntegeahie. Hianagi hazenke vahe'mofo akrehe akrehe'zamo'a, zamagrira zamahe fanane hugahie. ⁴Refkoma hugantesia knarera, feno zankamo'a kaza osugosie. Hianagi fatgoma huno manizamo'a frizampintira kagu'vazigahie. ⁵Fatgo vahe'mokizmia tamagehu zamavu zamavamo hanige'za, kama nevaza kamo'a, knare hu'nesige'za vugahaze. Hianagi havi vahe'mokizmia zamagra nehanaza kumimofo kna'amo, zamazeri traka hugahie. ⁶Fatgo znavu' znavama nehaza vahe'mokizmia, fatgo znavu' znavo zmimo'a zamagu nevazie. Hianagi fatgo osu vahe'mokizmia fatgo osu znavu' znavo zamo zmazerigahie. ⁷Kefozama nehia vahe' moma erinaku'ma amuhama nehia zamo'a frisigeno'a anama erinakuma amuhama nehiazamo'a, amane zankna hugahie. ⁸Hazenke zamo'ma fatgo vahete'ma esniana, Ra Anumzamo'a aza huno avare atrenigeno, ana hazenke zamo'a kefozama nehanaza vahete egahie. ⁹Anumzamofonku'ma korema hunte'za agorgama omaniza vahe'mo'za, kezmireti tava'ozmirema mani'namokizmia zamazeri haviza nehaze. Hianagi fatgo vahe'mo'za ama' antahiza zamimo zamagu nevazie. ¹⁰Fatgo vahe'mo'zama nomaniza zmifima knare hazageno'a, rankumapi vahe'mo'za musenkase nehaze. Hagi kefo zamavu zamavama nehaza vahe'ma fri'zage'za, havizama nehiazana vgaregahie hu'za tusi muse nehaze. ¹¹Anumzamoma fatgo vahe'mofo nomanizama asomuma huntegeno'a, rankumamofo agimo'a marenerie. Hianagi kefo avu'avama nehia vahe'mofo agipintima esia kemo'a, rankumara eri haviza hutregahie. ¹²Tava'ozmirema nemaniza vahe'ma zamage henkaminetaza vahe'mo'za, neginagi vahe mani'naze. Hianagi fatgo antahizane vahe'mo'za, kea osu akohe'za nemanize. ¹³Iza'o vahe amefi kema huno vanoma hanimo'a, oku'a fraki'nesia zana hu'ama hugahie. Hianagi tamage kema hu vahe'mo'a, nefuma hu'nenia zana huama huontegosie. ¹⁴Ama' antahizane kva vahe'ma omanisigeno'a, kumamo'a haviza hugahie. Hianagi knare antahizama ami vahe'ma rama'ama mani'nenageno'a, kumamo'a hankvetino knare hugahie. ¹⁵Mago'mo'ma vahepintima nofima hu'nesigenka, anazamofo nona huna miza kamigahue hunka hanunka, knaza erifore hugahane. Hianagi ana'ma hu'zankuma avesrama hanimo'a, agra'a aguvazigahie. ¹⁶Rimpa fru avu'ava ene a'mofona, agesga hunentaze. Hianagi vahekuma asuragionte ne'mo'a, feno zanke e'nerie. ¹⁷Vahe'mofo asuraginteno so'e avu'avama

hunte ne'mo'a, agra'a azeri so'e nehie. Hianagi vahe'mokizmi havizama huzmantea ne'mo'a, agra'a azeri haviza nehie. ¹⁸Kefo avu'avama nehaza vahe'mo'za, antesaza feno zmimo'a atupa knafi megahie. Hianagi fatgo vahe'mokizmi mizamo'a, zaza kna megahie.

¹⁹Fatgo vahe'mo'za knare manizanku nehakaze. Hianagi havi avu'avazama nevaririza vahe'mo'za, frizanku nehakaze. ²⁰Hagi akrehe akrehe avu'avazama agu'afima me'nea vahe'mofona, Ra Anumzamo'a agotenezmante. Hianagi fatgoma hu'za nemaniza vaheku, Ra Anumzamo'a muse hunezmante ²¹Tamage, havi avu'avama nehaza vahe'mo'za hazenkea agateore'za, ana hazenkea erigahaze. Hianagi fatgo vahe'mokizmi mofavreramina, Ra Anumzamo'a keagaga huozmanteno zmagu'vazigahie. ²²Hentofa agi agonane a'mo'ma fatgo osu avu'avama nehia a'mo'a, agra afu'mofokolire tro hunte rinima agonafi antanintaza kna hu'ne. ²³Fatgo avu'avama nehaza vahe'mo'za, knare'zama erifore'ma hanaza zanku zmave'nesie. Hianagi havi zamavu'zamavama nehaza vahe'mo'za hazenkefi manigahune hu'za antahigahaze. ²⁴Zamagragu'ma ontahiza vahe'ma zamaza nehaza vahe'mo'za, zamagra mago'ane eri avitegahaze. Hianagi rumofo amiga zama omisnazana, maka zankura eme atupa hugahaze. ²⁵Muse hu'za vahe'ma vevama nehaza vahe'mo'za, zmagra'a rama'aza erigahaze. Vahe'ma zmazahu vahe'mo'za, ana nona'a erigahaze. ²⁶Iza'o nezama'ama zgore'ma otreno, azeri akonama hania vahe'mofona, vahe'mo'za huhaviza huntegahaze. Hianagi iza'o nezama'ama zgore'ma atresimofona, asomu'mo agritera megahie. ²⁷Iza'o knare avu'ava zankuma kazigazi huno hakesimo'a, knare'za erinkeno, kefo zanku'ma hake'simo'a, kefoza erigahie. ²⁸Iza'o rama'a fenoma ante'nesia zanku'ma antahintahima hanimo'a, evuramigahie. Hianagi fatgo vahe'mo'za zafamo amu eri mareankna hu'za, tre tre hugahaze. ²⁹Naga'amofoma hazanke'ma erimisimo'a, mago'zana erisinti oharegosie. Neginagima hanaza vahe'mo'za ama' antahi'zane vahe'mokizmi eri'za vahe manigahaze. ³⁰Fatgo vahe'mofo avu'avamo'a, asimuni eri zafagna hu'ne. Hagi iza'o vahe'ma agu'mavazimo'a ama' antahi'zane vahe mani'ne. ³¹Ama mopafima fatgo vahe'mo'za miza zamia e'nerisage'za, kefo zamavu'zamavama nehanaza vahe'mo'zane, kumi vahe'mo'za knazana erigahaze.

Fatgo vahe'ene kefo avu'ava nehaza vahe'mofo naneke

12 ¹Azerinte fatgohu kegu'ma avesintemo'a, ama' antahizamofonku avesinente. Hianagi azeri ante fatgohu kegu'ma avesrama hunte'mo'a, neginagi vahe mani'ne. ²Knare zamavu'zamavama nehaza vahera, Ra Anumzamo'a avesi nezamanteanagi, havi zamavu'zamavama hunaku'ma retroma nehaza vahera, Ra Anumzamo'a haviza hu'naze huno ke huzmantegahie. ³Kefozama hanaza zantetira mani'zamia retrora

osugahaze. Hianagi fatgo znavu'znavazama hanazana, arafunare'za mani'nageno, vahe'mo'za eri tasagira osugahaze. ⁴Hentofa avu'ava'ene a'mo'a, nevena knare agi nemie. Hianagi knare avu'ava osania a'mo'a, neve zaferinafi namu reno kasriankna hugahie. ⁵Fatgo vahe'mo'ma antahizama retroma hania antahizamo'a, knare huno fatgo hu'ne. Hianagi havi zamavu'zamava nehanaza vahe'mo'zama, tami'naza antahi'zana, regavatga hugahaze. ⁶Kefo zamavu zamavama nehaza vahe'mokizmi ke'mo'a, vahe zamahe nefria vahe'mokizmi zamazankna hu'ne. Hianagi fatgo vahe'mofo kemo'a, vahe'mokizmia zamagu'nevazie. ⁷Kefo zamavu zamavama nehaza vahe'mo'za, haviza hu'za fanane nehaze. Hianagi fatgo vahe'mokizmi nagamo'za, oti hanavenetize. ⁸Antahizama'amo knare'ma hu'nesia nera, vahe'mo'za husga huntegahaze. Hianagi antahiza zmimo'ma fatgoma osu vahera, vahe'mo'za zamavesra huntegahaze. ⁹Eri'za vahe'ama mani'nenia vahe'mo'ma, anteramino amane vahe maniazama hanimo'a, zamunte omane vahe'mo'za zamagra'a zamavufga erisga nehazageno ne'zazmia omane vahera zmagatere'naze. ¹⁰Fatgo vahe'mo'a zgagafa'amofona kegvagriso'e hunezamante. Hianagi kefo zamavu'zamavama nehaza vahe'mo'za, zgagfa zamia kevg hugahazanagi, kanonkeve zamigahaze. ¹¹Amuho hu'za hozama antaza vahe'mo'za, rama'a neza me'nenige'za negahaze. Hianagi neginagi vahe'mo'za, nena rga'a omne'zante knazmia ahe friza erizana e'nerize. ¹²Kefo zamavu'zamavama nehaza vahe'mo'za, kefo zamavu'zamava hu'za eriza vahe'mokizmi zante ke zmanunu nehaze. Hianagi fatgo vahe'mo'za, arafuna rene'za raga rentegahaze. ¹³Kefo zamavu'zamavama nehaza vahe'mo'za, havigema nehaza kezamifinti, krifu ahazankna nehaze. Hianagi fatgo vahe'mo'za, ana krifufina ohe'za agate'neraze. ¹⁴Knare zmageru'ene vahe'mo'za, kezmireti knare'zana e'nerize. Hagi eri'za vahe'mo'za, anahu kna hu'za erizazmireti mizazmia e'nerize. ¹⁵Neginagi vahe'mo'zama zamagesama antahizana, zamagrama nehazazamo'a fatgo hu'ne hugahazanagi, ama antahizane vahe'mo'za rumo'zama antahintahima zamiza kea nentahize. ¹⁶Neginagi vahe'mokizmia zmarimpa he'zamo'a ame huno amate eama hanigenka kegahananagi, ama' antahizane vahe'mo'a, azeri havizama nehinke'no'a, rimpa he'zamo'a eama hanigenka onkegahane. ¹⁷Tamage'ma hu vahe'mo'a, keagare'ma otisimofona tamage huno hufore huntegahie. Hianagi havigema hu vahe'mo'a, keagare'ma otisimofona havige huno hu frakintegahie. ¹⁸Antahintahima osuno ame'ama huno hu ke'mo'a, kazimo vahe avufafi reankna nehie. Hianagi, antahintahima huteno keagagama hu vahe'mofo kemo'a, zamaza huno zamazeri neganamare. ¹⁹Tamage ke'mo'a mevava hugahie. Hianagi havigema hu kemo'a, zazatera omanegahie. ²⁰Kefo antahintahine vahe'mokizmi zamagu'afina vahe'ma rezmavataga hu antahizamo avitene. Hianagi rimpa fru zanku'ma nehaza vahe'mo'za,

muse hugahaze. ²¹Fatgo vahe'mokizmirera hazenke zana omegahie. Hianagi havi zamavu zamava ene vahe'mokizmirera, hazenke zamo'a avitegahie. ²²Ra Anumzamo'a havigema haza vahekura, tusiza huno agotezmanteno avesra hunezamante. Hianagi, tamage'ma nehaza vahekura, tusi muse nehie. ²³Ama' antahizane vahe'mo'za ame hu'za antahintahi zazmia eri ante ama nosaze. Hianagi neginagi vahe'mo'za, neginagi antahintahizamia ame huza hu ama nehaze. ²⁴Hanavetinka eri'zama erisanana, kva vahe fore hugahane. Hianagi feru vahe'ma manisanana, kazokzo eri'za vahe manigahane. ²⁵Antahintahi hakarema hu'zamo'a, vahe'mofona azeri antepri nehie. Hianagi zmazeri hanaveti ke'ma vahe'ma huzami zamo'a, zamazeri antesga nehige'za muse nehaze. ²⁶Fatgo vahe'mo'za tava'ozamire'ma nemaniza vahe'mokizmia, knare antahiza zamiza knare kante zmavare'za nevaze. Hianagi kefo zamavu zamavama nehaza vahe'mo'za, zamavre'za havifi nevaze. ²⁷Feru vahe'mo'zama zgagfa ahe'sazana onkregahaze. Hianagi kazigazi huno eri'zama eri'zamo'a, vahe'mofona mrrerisa feno zama'e. ²⁸Fatgo avu'avama huno manizamo'a, knare nomanizamofo ka me'ne. Hagi ana fatgo avu'avama avaririzamo'a, frizana omanene.

13 ¹Ama' antahizane mofavremo'a nefa'ma avumroma antesiankea antahigahianagi, veganokano kema hu mofavremo'a, vahe'mo'ma avumroma antesiankea ontahigahie. ²Knare kema vahe'mokizmima huzmi vahe'mo'za, knare zana e'neriza muse hugahaze. Hianagi hazenke vahe'mo'za, vahe'ma zmazeri haviza nehu'za zmatama zamizanku zmave'nesie. ³Iza'o agi'ma kegavama huno kema himo'a, agra'a maniza kegva nehie. Hianagi rama'a keagama hania vahe'mo'a, agra'a azeri haviza hugahie. ⁴Feru vahe'mokizmi zmagu'amo'a, rama'a zama erizanku zmave'nesianagi, anazana e'norize. Hianagi amuhu hu'za eri'zama erisaza vahe'mo'za, zmavesizana eri knare hugahaze. ⁵Fatgo vahe'mo'za havigema huzankura zamavesra nehaze. Hianagi kefo zamavu'zamava nehaza vahe'mo'za, rumokizmirera zmagaze huno zamagote zmavu'zmava nehaze. ⁶Fatgoma huno manizamo'a kva hugantena, knare hunka hazenkea omanesigenka manigahane. Hianagi kefo avu'avamo'a, kumi vahera azeri haviza hugahie. ⁷Mago'a zmunte omane vahe'mo'za, feno vahe kna nehaze. Hagi mago'a feno vahe'mo'za, zamunte omane vahe kna nehazanagi, feno vahe mani'naze. ⁸Feno vahe'mo'za nomaniza'zmima eri havizama huzankura, miza hu'za manigahaze. Hianagi zamunte'ma omane vahe'mofona, mago vahe'mo'a azeri korera osugahie. ⁹Fatgo vahe'mokizmi lamu tavimo'a, ru masa nehige'za, muse nehaze. Hianagi kefo zamavu'zamavama nehaza vahe'mokizmi lamu tavimo'a, asu nehie. ¹⁰Avufga ra huno vahe'mofo agorga omani avu'avazamo'a, ha' fra hu'za avreno ne-e. Hianagi avumro kema antahino amagama ante vahe'pina, knare antahizamo'a megahie. ¹¹Revatga

hunka havige kantetima eri'sana zgom'o'a, ame huno fanane hugahie. Hianagi eri'zama erino, osia eri atruma hute hutema himo'a, rama'a eri atru hugahie. ¹²Vahe'mo'za fore hugahie huza amuha nehaza zamo'ma fore'ma osanige'za, zmagu'amo'a haviza hugahie. Hianagi ana zamo'ma e'ama'ma hania zamo'a, asimu ami zafagna hugahie. ¹³Avumroma antesia kemofoma zokagoma antesimo'a, agra'a hazenkefi mani'noe huno hugahie. Hianagi kasegema asaminia kemofa agorga'ama maninimo'a, nomanizama'afina knare hugahie. ¹⁴Ama' antahizane vahe'mo rempima hugamisia zamo'a, asimu ami ti kapui hanatiankna hu'neankino, iza'o ana kema antahimofona, frizamofa krifufintira agatenere. ¹⁵Knare hu'za antahi amama haza vahe'mokizmia, vahe'mo'za zamavesi nezamantaze. Hianagi hazenke vahe'mokizmi zmvu'zmvamo'a, hanavetino haviza hu'ne. ¹⁶Maka zamofa ankereno hu vahe'mo'a agha antahiteno, maka zana nehie. Hianagi neginagi antahintahine vahe'mo'za, zamagesa ontahi neginagi zmvu'zmvava eri ama nehaze. ¹⁷Kefa vahe'mofoma katogema huntisigeno vaniana, hazenkefi ufregahie. Hianagi iza'o tamagama huno kema hu vahe'ma, ke erino vanigu'ma katogema huntisigeno erino vaniana, vahe'mokizmia zmazeri knare hugahie. ¹⁸Iza'o avumaroma antesaza kema ontahisimofona amunte omnesigeno, agazegu hugahie. Hianagi izano azeri fatgohu kema asamisigeno antahino amage antesimofona, agrira husaga huntegahaze. ¹⁹Avenesinia zama e'nerisigeno'a, agu'amo'a muse hugahie. Hianagi neginagi vahe'mo'za havi zmvu'zmvava nehaza zampintima atreno atiramizankura zmvavesra nehie. ²⁰Iza'o knare antahizane vahe enema vanoma nehia vahe'mo'a, knare antahiza erigahie. Hianagi neginagi vahe enema tagrote'za vanoma nehaza vahe'mo'za, hazenke erigahaze. ²¹Hazenke zamo'a kumi vahe'mokizmi nezmavaririe. Hianagi fatgo vahe'mokizmia, fenozmimo'a rama'a hugahie. ²²Knare vahe'mo'a mofavre'amo'ene henka negehoma eri sintima haresia zana, ko retro huzmanteteno nefrie. Hianagi kumi vahe'mo'zama fenoma eri atruma haza fenona, fatgo vahe'mo'za erigahaze. ²³Zamunte omane vahe'mokizmi hozafina, rama'a neza fore hugahianagi hazenke nomanizamo'a timo'ma hiaza huno harafi huno vugahie. ²⁴Iza'o mofavre'amo hazenke nehanigeno knoma amino azeri fatgoma osanuno'a, mofavre'a avasinonte. Hianagi iza'o mofavre'ama avesima nentemo'a, hanavetino azeri fatgo hugahie. ²⁵Fatgo vahe'mo'za rama'a ne'za me'nege'za nezamu nehaze. Hianagi kefo vahe'mofoza, zamaga tevava nehaze.

14 ¹Knare antahizane a'mo'a noma'a erise higeno, naga'amo'a so'e nehie. Hianagi neginagi a'mo'a, noma'ane naga'anena eri haviza nehie. ²Fatgo avu'avazama nevaririmofona, Ra Anumzamofa kore'zamo agu'afina me'ne. Hianagi iza'o kefo avu'avama nehimo'a Ra Anumzamofona korera hunonte. ³Neginagi vahe'moma kema hiankemo'a,

agrazante kano eri agumpi nente. Hianagi fatgo vahe'mofo kemo'a, agu'vazigeno knare huno nemanie. ⁴Bulimakao omani'nea afu nompina avusese nehie. Hianagi hanave bulimakamo'a rama'a ne'za erifore nehie. ⁵Tamage huno kema hu ne'mo'ma, keagarema otinea ne'ma, aza huno huama haniana, tamage hugahie. Hianagi havige'ma hu ne'mo'a keagarema otinea nema kema aza hunoma haniana havige hugahie. ⁶Hagi kiza zokago kehu vahe'mo'ma, knare antahizanku'ma hake'suno'a, keno eri fore osugahie. Hianagi ama' antahizane vahe'mo'a, fru huno antahizana erigahie. ⁷Knare antahizama omane vahepintira, mani agetaginka manio, na'ankure knare antahizana e'origahane. ⁸Knare antahizane vahe'mo'a kama vania kana antahi ani' hu'nenno vugahie. Hianagi neginagi vahe'mo'za, zamagrazmi rezmatga nehaze. ⁹Neginagi vahe'mo'za kumimofo nona'ama erizankura, hu kiza zokago nehaze. Hianagi fatgo avu'ava'ene vahepina, antahiami' avu'avazana me'ne. ¹⁰Mago'mago vahe'mo, agria'a rimpa aka'zana antahino keno nehie. Hagi mago'mo'e huno rumofo musezana mika'a erinte amara osugahie. ¹¹Kefo vahemofo nomo'a, haviza hugahie. Hianagi fatgo vahemofo seli nomo'a, hanavetino megahie. ¹²Mago kamo'a vahe avurera knare hugahianagi, avaririno atuparega vaniana fri'za me'ne. ¹³Musema huzampinena rimpa akazana me'ne. Hagi musema hu'zamo'a vgamaresigeno'a, asuragiza egahie. ¹⁴Zmentinti osu vahe'mo'za zamagrama hu'nesaza z mavu'zmava zante, mizana erigahaze. Hagi knare vahe'mo'a agra'a, hu'nesia avu'ava zante, mizana erigahie. ¹⁵Osi antahintahima erinaza vahe'mo'za, maka zankura zamentinti nehaze. Hianagi knare antahizane vahe'mo'a, kama vu zama'afina kva nehie. ¹⁶Knare antahizane vahe'mo'a kva huso'e hu'nenno, kefozana agatenere. Hianagi neginagi vahe'mo'a kva huso'e osuno, makazana amane hugahue huno nehie. ¹⁷Ame huno rimpama ahe vahe'mo'a, neginagi avu'ava nehie. Hagi kefozama hu antahintahima eri fore'ma nehia vahera, avesra hunentaze. ¹⁸Osi'a antahintahine vahe'mo'za, neginagi avu'avaza erisantiharegahaze. Hianagi makazama ankere'za hu vahe'mo'za, kini fetori anteanakna huno antahizana erigahaze. ¹⁹Iza'zo kefo zamavu'zmava nehanamo'za knare'zama nehanaza vahe zamavuga zamarena regahaze. Havi zama nehamo'za fatgo vahe'mokizmi kegina kafante zamarena ome reza husga huzmantegahaze. ²⁰Amunte'ma omne'simofona, knampa'amo enena avesionteguhie. Hianagi feno vahe'ma manisimofona, rama'a vahe'mo'za knampa'a manigahaze.

²¹Inamo'o tava'oma'arema maninesimofoma kefenkami netreno knarema huontesimo'a, kumi hugahie. Hianagi iza'o amunte omane vahe'ma knarema huntesimo'fona, Anumzamo'a asomu huntetegahie.

²²Havi avu'avama huzamofo kema retroma hanaza vahe'mo'za, havi kantera novazafi? Hianagi iza'zo knare avu'avama huzamofo kema

retroma hazamo'za, mani fatgoma huno manizane vga'ore avesizana ke'za erigahaze.

²³Hanavetiza mika erizama eriza vahe'mo'za, rama'a eriguhe'za erigahaze. Hagi mani'neza ke'agemu hu vahe'mo'za, zamunte omane vahe manigahaze.

²⁴Ama' antahizane vahemofu fenomo'a, anunte fetori meankna huno me'ne. Hianagi neginagi znavu'znavama nehaza vahe'mokizmi neginagi znavu'znavamo'a, zmazeri neginagi nehie.

²⁵Keagama humanezmantesafima, tamage hunka kema huamama hanamoka, rama'a vahe zmagu'vazigahane. Hianagi keagafima havigema hunka huamama hanamoka, havige vahe manigahane.

²⁶Ra Anumzamofoma korema huntessimofona, Agra hanave vihu huntkeno mani'neza, mofavre'amo'za hanave vihufi manigahaze.

²⁷Ra Anumzamofoma kore'ma huntenu Agri agorga manizamo'a asimu ami' kapu'i ti me'neankino, vahe'ma ahefri krifu'fintira azeri atregahie.

²⁸Kinimo'ma rama'a vahe'ma kegvama hanige'za, agrira rahi amigahaze. Hianagi kinimo'ma osia vahe'ma kegvama hanuno'a, agra haviza hugahie. ²⁹Ame' huno zmarimpa ohe vahe'mo'za, ama' antahiza e'nerize. Hianagi hatuma huza zamarimpahe vahe'mo'za, neginagi znavu'znavo eri ama nehaze. (Jem 1:19-20)

³⁰Vahe'mo'ma rimpama ante fru hunoma mani'zamo'a, avufgamofona asimu amigahie. Hianagi rumofu zante'ma kesanema nehanimofona, ana avu'avamo'a zaferinafi namureno kasriankna hugahie. ³¹Kagrama amunte omane vahe'ma zmazeri havizama hanunka, troma huzmantenea Anumzamofu huhaviza nehane. Hianagi kagrama zmazeri so'e hanunka, Anumzamofona ra ahi amigahane. ³²Kefu avu'avama nehia vahe'mofona, ana kumi avu'avazamo azeri haviza hugahie. Hianagi fatgo vahe'mo'ma, frisigeno'a, agu'vazigahie. ³³Knare antahi'zamo'a, ama' antahizane vahe'mofu agu'afi akoheni meso'e huno megahie. Neginagi vahemofu agu'afina ana knare antahizamo'a, agra'a azeri ante'ama' nehie. ³⁴Fatgo avu'ava hu'zamo'a ana mopafi me'nea kumara azeri antesga nehie. Hianagi kumi'ma nehaza avu'avazamo'a mika ana mopafi vahe'mofona, azeri agaze nehie. ³⁵Knare avu'avamahia eriza ne'mofona, kinimo'a muse hunente. Hianagi agazema hu avu'avama nehia eri'za vahera, kinimo'a rimpama hentegahie.

15 ¹Akohenka antefru hunka ke'nona hanana zamo, rimpama akahe'zana eri'ame nehie. Hianagi hakrugema hanana zamo'a, rimpahazana azeri otigahie. ²Knare antahizane vahe'mofu agipintira, knare antahiza e'nige'za vahe'mo'za antahi muse hugahaze. Hianagi neginagi vahe'mofu agipintira, neginagi kemo akaha hunerame. ³Ra Anumzamofu mika kaziga kefu vahete' ene, knare vahetera avua keteno nemanie. ⁴Fru kema hu'zamo'a vahe'mofu asimu ami zafagna

hu'ne. Hianagi akrehe akrehe kema hu'zamo'a, vahe'mofo agu'a ahenefri. ⁵Neginagi antahizane vahe'mo'a nefa'ma azeri fatgo hiankea nontahie. Hianagi iza'o azeri fatgoma hiankema antahimo'a, knare antahiza e'nerie. ⁶Fatgo vahe'mokizmia nozamifina, fenozamo avinete. Hianagi kefo vahe'mo'za erisaza mizana, hazenke'za erigahaze. ⁷Knare antahi'zane vahe'mo'za, antahizana vahera nezamize. Hianagi neginagi antahizane vahe'mo'za, anahura osugahaze. ⁸Kefo avu'avama nehaza vahe'mo'zama, Ra Anumzamofonte'ma kre sramnama vunentaza zankura, agonete. Hianagi fatgo vahe'mo'zama haza nunamunku, Agra muse nehie. ⁹Kefo vahe'mo'ma hia avu'ava zankura, Ra Anumzamo'a agotenente. Hianagi fatgo avu'avama huzanku'ma kazigazima hia vahe'mofona, Ra Anumzamo'a avesinente. ¹⁰Fatgo kamofoma amefi humisimo'a, tusi'a hazenke erigahie. Iza'o azeri fatgohu kemofoma avesrama huntesimo'a, frigahie. ¹¹Fri' vahe'mofo kuma'mo'ene frizamo'a, Ra Anumzamofu avurera amate me'neankino, tagutumotia keno antahino hu'ne! ¹²Veganokno kema hu vahe'mo'za, azeri fatgoma hanimofona avesra hunenteno, ama' antahizane vahe'mofontera aza hinogura urava'o osugahie. ¹³Krimpamo'ma musema hu'nesigeno'a, kavu'gosafintira knare huno kizankiza hugahie. Hianagi karimpamo'ma musema osu'nesigeno'a, kavugosamo'a rugaririgahie. ¹⁴Ama' antahizane vahe'mo'za antahizama erizankura zamaganete. Hianagi neginagi antahizane vahe'mofona havi kemo'a, ne'zama'agna hugahie. ¹⁵Zamunte omane vahe'mo'za mika zupa maniza zmifina tusi'a amuho nehu'za maragu'zantetize. Hianagi muse arimpame manisimo'a, nezane tine neneno muse huvava hugahie. ¹⁶Osi'a fenoma anteneta Ra Anumzamofonkuma kore'ma huntenuzamo'a, rama'a fenoza ante'neta hazenkema erizana agaterene. ¹⁷Vahe'ma avesinentenka hozafi kamo'ma osia refko hunka ne'zamo'a, ra bulimakao afu'ma ahegino rimpagnanema refkoma huno nezana, agaterene. ¹⁸Ame' hunoma rimpama ahe vahe'mo, ha'frama hu'zana eri fore nehie. Hianagi akohenoma rimpa fru huno mani vahe'mo, ha'frama huzana erifru nehie. ¹⁹Eri'za e'ori feru'ma mani vahemofu kamo'a, ave'ave trazampima neviankna hu'ne. Hianagi mani fatgo hu'za mani vahe'mokizmi kamo'a ranka me'nege'za nevaze. ²⁰Ama' antahi'zama me'nea mofavremofu nefa'a, muse nehie. Hianagi neginagi ne'mo'a, nererana kefenkaminetre. ²¹Antahizama'a omane vahe'mo'a, neginagi avu'avazankura muse hugahie. Hianagi ama' antahizane vahe'mo'a, knare zanke nehuno, fatgo kante nevie. ²²Knare antahizama vahepinti e'orinenka mago'a zama retroma hunaku'ma hananana, ana zamo'a forera osugahie. Hianagi rama'a knare antahintahima eritenka, retroma hanana zamo'a, efore hugahie. ²³Fatgo hunoma kenonama hanimo'a, muse hugahie. Hagi kna fatgore'ma huga kema hania kemo'a, knare'zantfa hugahie. ²⁴Knare antahi'zane vahe'moma asimu erisia kamo'a anagamu marenerino,

fri vahe kumapima uramizankura kegva hunente. ²⁵Ra Anumzamo'a avufama eri antesgama hanimofona nomanizama'a, eri haviza hugahie. Hianagi kento a'mofo fenoma'ane nonkuma'a, kegva huntegahie. ²⁶Kefo avu'avazama hu antahizama retroma huzankura, Ra Anumzamo'a avesra huno agonete. Hianagi avusese hu'nea kema huzankura, Agra muse nehie. ²⁷Iza'o mika'za rehatri huno nagrike zanema hu' vahe'mo'a, hazenke erino naga'afi efregahie. Hianagi havi kazigatima masavema huno mizama sezankuma avesrama huntesimo'a, knare huno manigahie. ²⁸Fatgo agu'ane vahe'mo'a agha antahiteno, kenona nehie. Hanki kefo vahe'mofo agipintera, kefoge atineramie. ²⁹Ra Anumzamo'a kefo zamavu'zmavama nehaza vahe'mokizmirera, afete nemanie. Hianagi fatgo vahe'mokizmi nunamunte, agha anteno antahinezamie. ³⁰Musema nehia vahe'mofo avufima kesanana, muse hugahane. Knarezama hu'nesia zamofu agenkema hu ke'mo'a, vahe'mofona zaferina kampina azeri fru hugahie. ³¹Iza'o so'e nomanizama manisieguma, azeri fatgoma hu kema nehinkeno antahisimo'a, knare antahizane vahe'mozama manisaza amunompi manigahie. ³²Iza'o azeri fatgo hu kema nehanigeno antahisimo'a, agra'a azeri haviza nehie. Hianagi iza'o azeri fatgo hu kema nehinkeno, antahisimo'a, ama' antahintahi erigahie. ³³Ra Anumzamofonku korema hunteno agorgama mani avu'avazamo, vahe'mofona knare antahintahia rempi hunemie. Hagi kagrama anteraminka manisunka, rankagia erigahane.

16 ¹Vahe'mota e'ina hu'za hugahune huta antahintahia retro hugahunanagi, Ra Anumzamoke ana antahintahima retroma hanuntera, huvigare kea huntegahie. ²Tagrama mika zama hunazamo'a knare hune huta tagesa antahigahunanagi, nanknahu tagu'tagesareti ana mika'zana nehune Ra Anumzamoke refako hugahie. ³Mika'zama huku'ma hanana zana Ra Anumzamofu azampi antegeni, ana mika zama huku'ma antahintahima retro'ma hanana zamo'a, nena'a fore hugahie. ⁴Ra Anumzamo'a agafa'a me'negeni makazana trohune. Hagi zmahe fananema hania kefo znavu'zmavama nehaza vahe'enena, tro huzmantene. ⁵Ra Anumzamo'a znavufga ra nehaza vahekura, avesra huzmanteno agotenezmante. Hagi zamavufara hanaza vahe'mo'za, knazampi manigahaze. ⁶Tamage huta Ra Anumzamofu avesinteta mani fatgo huta manisunkeno'a, Ra Anumzamo'a kumitia eritregahie. Ra Anumzamofonku'ma kore hunteta Agri agorga manisunazamo, kefo zampintira tazeri amane hugahie. ⁷Ra Anumzamo'ma musema nehia kantema tavutva'ma hanunkeno'a, ha' vahetimo'zanena zamarimpa fru hurantegahaze. ⁸Fatgo manizane maninenka osi'a fenoma ante'snamo'a, havi kampinti rama'a fenoma ante'sana zana agaterene. ⁹Ana hugahune huta antahintahia retro hugahunanagi, Ra Anumzamo Agrake makazama hanuna kana erinte fatgo hugahie. ¹⁰Kini vahe'mo'za Anumzamo'ma e'ina

hihoma huno zamia antahizanteti kea nehaze. Hagi vahe'ma refakoma hanu'za, fatgo hu'za vahera refako hiho. ¹¹Fatgoma huno makazama refko hu'zana, Ra Anumzamofontegati ne-e. Hagi fatgoma huno makazama kna'amoma hu'nea avamente'ma refkoma huzanku avenesie. ¹²Kini vahe'mofona kefo avu'avazankura agoteno, avesra nehie. Na'ankure kini trama me'neana, fatgo avu'avamofa agofetu me'ne. ¹³Kini vahe'mo'za fatgo vahemofa kegu musena nehu'za, tamage keagama nehia vaheku zamavesinezamantaze. ¹⁴Kini ne'mofa rimpa aka'zamo'a frigahane naneke me'ne. Hianagi knare antahi'zane ne'mo'a, kini ne'mofona rimpa azeri fru hugahie. ¹⁵Kini ne'mofa avugosamo'ma kiza avu'avama haniana, kasimu erinka manigahane huno nehie. Ana avu'avamo'a, mona hampomo ko erino eramigeno, ne'zamo afureankna nehie. ¹⁶Knare antahi'zama eri'zamo'a golia agateregeno, ama' antahizama avesinteno erizamo'a, silva agatere'neankino hentofaza hu'ne. ¹⁷Fatgo vahe'mofa kamo'a, ranka me'nege'za, kefo avu'avazamofona azeri agateregahaze. Iza'o kva hu'nenana kama avaririmo'a, agra'a agu'nevazie. ¹⁸Kavufga rahu zamo'a, kazeri haviza hugahie. Kagra kavufga husgama hu'zamo'a, kazeri tna fakofa hugahie. ¹⁹Akoheno anteramino amunte omane vahe enema manizamo'a, avufga rahu vahemo ha'pinti feno eri'neaza refko hu'zana agatere'ne. ²⁰Iza'o avumro antesaza kema avaririsimo'a, hakare'zama hanifina knare hugahie. Ra Anumzamofontema amentinti'ma hanimofona, asomu huntegahie. ²¹Antahi amama haza vaheku, ama' antahizane vahere huza hugahaze. Knare kema hania nanekemo, vahe'mofona avare agrarega atregahie. ²²Ama' antahintahima eri'naza vahe'mofontera ana ama' antahizamo'a asimu ami kampu'i tinkna hu'ne. Hianagi neginagi avu'avazamo'a, neginagi avu'avama haza vahetera, nona'a knaza nezamie. ²³Ama' antahizane ne'mofa agu'amo azeriante fatgo higeno, mago'ane vahe'ma agu'ama azeri rukrahe hu kea agipintira atineramie. ²⁴So'e kema hu'zamo'a tumemofa rima'agna hu'neankino, vahe'mofa agu'amemofontera haga higeno, zaferinamofona azeri so'e nehie. ²⁵Mago'a vahe'mo'za knare kante nevune nahazanagi, anama nevaza kamofa atuparega friza me'ne. ²⁶Eri'zama e'neriza vahe'mo'za antahi'naze, eri'zama zamunasisi hu'za e'orisanu'za ne'zana onegahazankiza, zmagamatezamo hige'za, eri'zana e'nerize. ²⁷Kefo vahe'mo'za, kefozama eri fore huzanku nehakraze. Ke'zmimo'a afe tevemo te'osa hiankna huno, vahe'mokizmia zamazeri haviza nehie. ²⁸Akrehe akrehe zmageru'ene vahe'mo'za, vahe'mokizmi amunompina kea erintage'za ha' fra nehaze. Vahe'mofa amefi agenke'ma huzamo knare arone'a, azeri netane. ²⁹Ha'framahu ne'mo'a, tava'oma'arema nemanimofona revatga huno avreno havi kante nevie. ³⁰Iza'o avuma mago ne' resukima nemimo'a, akrehe akrehe avu'avaza nehie. Hagi iza'o agi'ma haninkofisigenka, hazenke avu'ava nehie hunka antahigahane.

³¹Fatgo avu'avazama hu'zama nevaza vahe'mokizmia tu zmazokamo'a, kini fetori anunte antanintea kna nehige'za, ra agi nemize. ³²Ame huno arimpa'gnama osu vahe'mo'a, himamu vahera agateregeno, iza'o rimpa he'zama azerirava nehimo'a, tusia kuma'ma ha'ma huno eri'nemofona agatenere. ³³Mago'azama hunakura satu zokago renka antahياما hugahue hnananagi Ra Anumzamoke hu izora hutenkeno, anazamo'a eforera hugahie.

17 ¹Vahe'mo'ma rimpa frune akoheno manineno naga'anema osia kavema ne'zamo'a, tusi'a ne'zama hafra nehuno kreno ne'zana agatere'ne. ²Knare antahizane eriza ne'mo'a, kva'amofu mofavre'mo'ma agaze hu avu'avama hania mofavremofona ugota huno kegva huntene'no, mofavre'amo'za erisanti haregahaze huzmante'nesafintira erigahie. ³Koline silvanena tevefi kre'za eri agru nehaze. Hianagi Ra Anumzamoke tagu'amofona rehenonege. ⁴Kefo avu'ava'ene vahe'mo'a, havigema nehazankea nentahie. Hagi tavre vahe'mo'a, vahe'ma azeri haviza hukema hazanke nentahie. ⁵Amunte omene vahe'ma huhaviza huntesia vahe'mo'a, tro'ma huzmante'nea Ra Anumzamofu huhaviza hunente. Hagi hazenkema erisaza zanku'ma muse hanimo'a, agra'a havi mizana erigahie. ⁶Nenama huza ra avuma omesaza vahe'mokizmia, zamagehe'mo'za, kini fetorikna zamanuntera hu'nage'za, ra zamagi vahe'mo'za nezamize. Hagi mofavre'mo'za nezmarrera zmafana muse huzmantegahaze. ⁷Neginagi vahe'mofontera knare ke'ma hu'zamo'a, haviza hu'neanagi, kva ne'mo'ma havigema hu'zamo'a, havizantfa hu'ne. ⁸Mago'mo'ma mago zama erinaku zgoreti'ma maseve'ma amino erisiazamo'a, agraragisa kaguvaza huno efore hiankna nehie. Iza'o anazama himo'a maka zampina knare nehie. ⁹Iza'o havizama huntessimofoma kefo zama'a atrentesimo'a, amunozanifina avesinte avu'avazamo'a, meno vugahie. Hianagi arone'amofu havi avu'avazama'agu hugantigama hanimo'a, knare knampa'a azeri atanegahie. ¹⁰Kemofoma refko huno antahi ankemare vahe'mofona, magoke zupama azeri fatgo hu kema asamisankeno'a antahigahianagi, neginagi vahe'mofoma azeri fatgo hunaku'ma 100ti'a zupa knona ami'sanana, avu'avara ruzahera osugahie. ¹¹Kefo avu'avazane vahe'mo'za, ha'ma erifore hu zankuke zamave'nesiankino, hazenke'zami vahera huntkeno zmavaririgahie. ¹²Anenta'ama kumzafama ase'nesaza beama, mago ne'mo'ma kantegama tutagihama huntzamo'a knare hu'neanagi, neginagi vahe'mo'za neginagi zamavu'zamavama nehaza vahe'enema tragoteno manizana agatere'ne. ¹³Hagi mago vahe'mo'a knare'zama magamofoma huntesia zanku'ma, nona huno kefozama huntesia vahe'mofona, kefo zamo'a naga'afintira atreno ovutfu hugahie. ¹⁴Ha' frama hu'zamo'ma agafama nehanigeta, koma eri amne osanunkeno'a, ti anagi atregeno ti hageno eankna huno rama'aza eri haviza hugahie. ¹⁵Kefo avu'avama nehia vaheku'ma fatgo

vahere nehu'za, fatgo zmavu'avazama nehaza vaheku'ma, kefo vahere hu'zama nehaza tare zmavu'zmavakura, Ra Anumzamo'a agoteno avesra hunezmante. ¹⁶Neginagi vahe'mo'za knare antahi'zama rempima hu'za eri zmave'sizama omane'nege'za, na'a higeza avono hu zgoa zamazampina eri'naze? ¹⁷Mika zupa knampatimo'za zmavesirantegahaze. Hagi knazampima tza hanagu tafuhe'mokizmia kasezmante'naze. ¹⁸Knare antahi'zazmima omane vahe'mo'za zamagrazmi huvempa hu'za, tava'ozmire nemaniza vahe'mo'za nofima hu'naza zama ovakanesageta, tagrati vakanezmantegahune hu'za nehaze. ¹⁹Iza'o ha'frama hu'zankuma avesintemo'a, kumiku avenesie. Iza'o agra'a agima erintesgama nehimo'a, hazenke erigahie. ²⁰Akrehe akrehe agu'ane ne'mo'a, knare zana hakeno erifore osugahie. Hagi iza'o tavre kema nehanimo'a, hazenkefi ufregahie. ²¹Neginagi vahe'mofo nerera nefa'a, tusi'a ataza e'nerie. Higeno nefa rimpamo'a, ana neginagi ne'mofonkura musena osugahie. ²²Musema huno mani'zamo'a, tusazamo vahera azeri so'e higeno maniankna nehie. Hianagi vahe'mofo antahizamo'ma havizama haniana, havi krimo zaferinafi me'nenno azeri haviza hiankna hu'ne. ²³Kema refkohu tratema kefo ne'moma maninesuno'a, keagama eri haviza hinogu oku'a masevema huno amisia zgoa e'nerino, keaga eri rukrahe huno fatgo kantera ontahigosie. ²⁴Antahi'zane vahe'mo'a knare antahizante avua anteno nevie. Hianagi havi vahe'mofo avumo'a, mopa ataginare ame huno omegege, emegege huno nevie ²⁵Neginagi mofavremo'za nezmafana zamasuzana eri nezamie. Hagi kasema ante'nea zamarerahe'ina, zmarimpa zamata eri'nezamize. ²⁶Fatgo hu'nesia vahe'ma knazama zamige, knare huno hazenke'a omane kva vahe'ma knoma ami'zamo'a, haviza hu'ne. ²⁷Knare antahintahima me'nea vahe'mo'a, rama'a keaga osugahie. Hagi ama' antahizama me'nenia ne'mo'a, ame huno rimpagna osugahie. ²⁸E'ina hu'negu neginagi vahe'mo'ma kema osuno manisia zankura, vahe'mo'za knare antahiza eri'ne hugahaze.

18 ¹Agra'aku'ma nemanisia vahe'mo'a, agraguke agesa nentahie. Knare antahizama eri'nea vaheku'enena ana ne'mo'a avesiozmantegahie. ²Neginagi vahe'mo'a ama' antahintahima erizankura, musena osugosie. Hianagi agra'a antahi'zanke hu'netreno manigahie. ³Kefo avu'ava'ene vahe'mo'a, mago'a vahekura antahi amane'za neseno, zmagi'a eri haviza nehuno, zmagaze eri'nezamie. ⁴Knare antahizane vahe'mofo agipinti kemo'a, tiru kna hu'ne. Hianagi mika knare antahizamo, timo kerifinti aviteno herafiramino neviankna nehie. ⁵Hazenkema huteno trate'ma otisigenka, hazenkema hu'nesia vahera aza osutfu huo. Hagi fatgo vahe'ma keagafima oti'nenigenka havigema huntanka azeri atre'zankura kva huo. ⁶Neginagi vahe'mofo kemo'a, hafra hu'za eri fore nehigeno, ana ke'zmimo'a kanonkevegu meme nehie. ⁷Neginagi vahe'mofo agi'mo'a, havi ke'agage nehanigeno, krifu

agra'a avufare anaginente'ankna nehiakino, agrira azeri haviza hugahie. ⁸Vahe agenkema hu'zamo'a, haga ne'zankna hu'neankino, ame huno vahe agu'afina ufregahie. ⁹Zaferina omane feru vahe'mo'a, makazama eri havizama nehia vahe'mofo nefu manine. ¹⁰Ra Anumzamofa agimo'a hanavenentake vihugna hu'neankino, fatgo vahe'mo'za agritega zamagare'za nevazageno, zamagu nevazie. ¹¹Feno vahe'mofo fenomo'a ra kuma zmimofa vihugna hu'neankino, kegva hurantenkenta knare huta manigahune hu'za nentahize. ¹²Avufga ra hu'zamo'a, henka hazenkefi kavrentena manigahane. Hianagi knare hunka anteraminka mani'zamo'a, kazerisga huno knare kagi kamigahie. ¹³Iza'o kema antahi anke ore'neni ke'nonama hanimo'a, agra neginagi avu'ava nehuno agaze zana agra'a erigahie. ¹⁴Krima eri'nesimo'ma ana zankuma antahintahi hakarema osaniana, ana krifina amane manino vugahie. Hianagi vahe'mofo antahintahimoma havizama haniana, iza knarera huno manigahie? ¹⁵Maka'zama antahi ankere vahe'mo'a, knare antahintahima erinakura muse nehie. Knare vahe'mo'a agesazofa huteno nemanie. ¹⁶Musezama eri'neni esimofona, kafana anagisigeno keagama hukuma hania rankva nera negesigeno, keaga humigahie. ¹⁷Keagafima otinesia ne'ma ese'ma keagama refkoma huno kesiana tamage hugahazanagi, anantema antahigesia ne'mo, hazenke'a keno erifore hugahie. ¹⁸Taisi zokagoma re'zamo ha frama hu'zana eri fru nehuno, hanave netremoke'ma ha'ma hu'zana zanazeri netane. ¹⁹Kagrama negafu'ma arimpama azeri havizama hu'nenana ne'ma avare'zamo'a, rankumamofa hanavenentake vihu hunteankna huno negafu'ma avare'zamo'a amuhu hu'ne. Ha' frama hu'zamo'a, rone ka'a hanavenentake kafa erigino rentroko huno, refko hiankna hugahie. ²⁰Knare kema kagipintima atiramisuno'a, knare ne'zama nankeno kamuma hiankna huno kaza hugahie. Fatgo kema hanana kemo'a, kazeri knare hugahie. ²¹Kekamo'a vahera zmazeri so'e nehuno, zmazeri havizana hugahie. Hagi kema huzantema avesima nentesimo'a, ana ke'amoma rentesia rga'a agra'a erigahie. ²²Iza'o a'ma hakreno erinesimo'a, knare'za hakreno eri'neankino, Ra Anumzamofa avesinente. ²³Amunte omane vahe'mo'a, asumaraginteno azama hanigu meme nehianagi, feno vahe'mo'a, hanave kefinti kenona nehie. ²⁴Rama'a ronekamo'a kazeri haviza hugahianagi, tamage ronekamo'a negafuma nehiaza huno tava'onkare manigahie.

19 ¹Amunte omane vahe'ma manineno, maka zampima mani fatgoma hu'zamo'a, neginagi vahe'moma akrehe krehe ageru'ma aruzana agaterene. ²Mago vahe'mo'ma keno antahinoma osu'nesia zama hunaku'ma haniana, knarera osugahie. Iza'o ame'ama huno mago zama hunakuma hanimo'a, ana zana eri haviza hugahie. ³Mago'a vahe'mokizmi zamagri'a neginagi z mavu'zmava zamo zamazeri haviza nehige'za, Ra Anumzamofona zamarimpa ahenentaze. ⁴Amunte'ma me'nea ne'mofona,

rama'a knampa'a manigahaze. Hagi fenoma'a omane ne'mofona knampa'amo'za netraze. ⁵Keagare'ma omatinesia vahe'ma havigema huno huamama hunteno azama hanimo'a, knazana erigahie. Hagi havi kema hanimo'a, mizama'a erigahie. ⁶Rama'a vahe'mo'za zamazama hania vahe arone manizanku zamave'nesie. Hagi maka vahe'mo'za muse zama zamiza vahe'mofo rone nemanize. ⁷Kagrima kamunte'ma omanesige'za, kafuhe'za kavesi ogantegahaze. Hagi knampa ka'amo'za mago'ane agatere'za zamavesra hugantegahaze. Kazama hanazegu'ma hake'sanana, zamagra omanigahaze. ⁸Kagrama knare antahi'zama erisunka, kagraka'agu avesinentane. Kagrama ama' antahi'zama azeri hampo'nama hanunka, knare hunka manigahane. ⁹Keagafima otisia vahe'ma havigema huno huama huntesia vahe'mo'a knaza erigahie. Hagi havigema hanaza vahe'mo'za, frigahaze. ¹⁰Neginagi vahe'mo'za marerisa zampina manigara osu'naze. Kazokzo eri'za vahe'mo'ma kva vahe manino, kva (princes) vahe'ma kegva huntezamo'a, knarera osu'tfaza hu'ne. ¹¹Knare antahi'zama eri'nesia ne'mo'a, ame huno arimpa ohegosie. Hagi havizama huntesia zanku'ma agesama ontahisiana, husga huntegahaze. ¹²Kini vahe'mofo rimpa he'zamo'a, laionimo rankrafa hiankna nehie. Hianagi vahe'ma zamavesinteno zamazama hu avu'avazamo'a, trazante ata ko arunteankna nehie. ¹³Mago ne'mofavremo'ma neginagi avu'avazama hiana, nefana tusi'a hazenke eri'nemie. Hagi mago ne'mofo a'mo'ma kefra nehuno, ke huvava hania a'mo'a, nomofo anuntupinti ko'arigeno varivri hiankna hugahie. ¹⁴Negrera negafampinti none fenozanena erisanti haregahane. Hianagi Ra Anumzamoke, ama' antahizane a'ra kamigahie. ¹⁵Feru vahe'moka kavu mase vava hugahane. Hagi eriza e'ori vahe'moka nezanku frigahane. ¹⁶Iza'o kasegema amage'antesimo'a knare huno manigahie. Hagi iza'o Ra Anumzamofu avu'avama amefi'ma humisimo'a, frigahie. ¹⁷Iza'o amunte omane vahe'ma knare avu'avama hunentemo'a, Ra Anumzamofu anara hunente. Hagi agrama hania avu'avamofu avamente, mizana amigahie. ¹⁸Mofavre kamofona azeri fatgoma hugama hu'nesire, avumaroma antenka azeri fatgo huo. Hagi azeri fatgoma osnanana, frinogu kave'nesie. ¹⁹Hantaka hunoma arimpa ahe vahe'mo'a, hazenke'a erigahie. Na'ankure kagrama aza hunka eri'amane hanankeno'a, henka ana ne'mo'a anazana nehinkenka aza huvava hugahane. ²⁰Kavumro antesia kema nentahinka, kazeri fatgoma hania kema avaririsunka, mani so'e hunka vugahane. ²¹Vahe'mo'a rama'a zanku antahi'zana eri retro huno hugahue hugahianagi, Ra Anumzamoma antahino fore hugahie hu'nesia zamoke fore hugahie. ²²Ra zama me'neana huvempama huntonesia kere, amagama anteno mani'zane. Hagi amunte omane vahe'ma manizamo'a, havige vahera agaterene. ²³Ra Anumzamofonkuma koro'ma hunteno agorga'ama manizamo'a, kavreno knare mni'zante vugahie. Hagi iza'o e'inahu'ma hanimo'a,

mago'zankura korera osuno knare huno manigahie. ²⁴Eri'za e'ori feru vahe'mo'a, ne'za nenaku tafepi azana antesigeno vugahianagi, ana ne'zana agipina erinteno onegahie. ²⁵Vahe'ma huhaviza nehania vahe'ma azerinka sefu'ma amisankeno'a, knare antahi'zama omane vahe'mo'za nege'za, knare avu'avara amage antegahaze. Hianagi knare antahizama me'nea vahe'ma azeri fatgo hanankeno'a, mago'ane antahizana erigahie. ²⁶Mago mofavremo'ma nefama neheno, nererama nompinti'ma ahenati atesia mofavremo'a, tusi'a agazeza erino naga'afina eme antegahie. ²⁷Kavumroma antesianke'ma ontahi'sanana, e'i knare antahizamofu kana atrenka havifi vugahane. ²⁸Havige hu vahe'moma havigema huno keagafima omati'nea vahe'ma huamama hunte'zamo'a, keagama antahi trara kiza zokago zankna nehuno, havi avu'avazana ne'za nazankna nehaze. ²⁹Vahe'ma huhavizama hunezmantaza vahe'mokizmi'a, mizazmia ko tro huzmantegenome'neankiza erigahaze. Nehanage'za neginagi hanaza vahera, knonkeve zamigahaze.

20 ¹Waini tima nenea vahe'mofona azeri neginagi higeno, vahe'ma huhaviza hu kea nehigeno, aka timo'a vahe'mofona azeri negi nenkeno ke huhaviza nehuno hara hugahie. Waini ti neno neginagi hu vahe'mofona, agripina ama' antahizana omanegahie. ²Kinimofu arimpa akahe zamo'a, laionimo rankrafa hiankna hu'ne. Kini vahe'mofu azeri arimpa ahe'simofona, ahe frigahie. ³Ha' frama hu'zanku'ma mani kore huno agatere'zamo'a, ra agi erigahie. Hianagi neginagi vahe'mo'za ame hu'za hafra nehaze. ⁴Feru vahe'mo'ma hozama ante knare'ma mopama rekorino hozama ontosuno'a, hozama hamare knarera ne'zana ohamaregahie. ⁵Vahe'mofu antahi'zamo'a tirukna huno me'neanagi, ama' antahizane vahe'mo'a ana tirupintira ana antahizana afi anaga netre. ⁶Rama'a vahe'mo'za, tavesi negantone hugahazanagi, mago mago vahe'mo'za tamage hu'za kavesigante'gahaze. ⁷Fatgo avu'ava'ene ne'mo'a, mani fatgo huno nemanie. Agri mofavre zgamo'za, asomu erigahaze. ⁸Kini vahe'mo'ma keagama refako hunaku'ma trate'ma mani'nenno, keaga refko huno havi avu'avazana ke fore nehie. ⁹Nagu'amo'a fatgo higena, nagra agru hu'noankino nagripina kumira omane'ne huno iza hugahie? ¹⁰Havige hu'za makazama refko huza kna'ama ke'zane, havige hu'za avamente refkoma osu'zanena Ra Anumzamo'a avesra huno agotenezmante. ¹¹Mofavremofona avu'avate negenka, agri avu'avamo'a agru hu'neanki, fatgo mofavre mani'neanki hugahane. ¹²Tagesama me'neana keaga antahizane, tavuragama me'neana tavuma ke'za me'neankino tarega'zana Ra Anumzamo museza tami'ne. ¹³Kagrama kavu'ma masetenka manizankuma kavesi kavesima haniana, kamuntera omanegosie. Kavumu'oma omasesanana ne'zama nesana zamo'a rama'a megahie. ¹⁴Knare osu'ne! Knare osune! Huno mago'a zama mizama seku'ma himo'a nehie. Hianagi mizaseno

kantegama nevuno'a, ana zankura knare'za erue huno rama'a muse ke hume nevie. ¹⁵Antahizama ami kemo'a, koline zago'amo'ma marerisa havea ageterene. ¹⁶Onke'nenana vahe'mo'ma nofima nehinkeno magomo apasegahue hanigenka, anamofu anakreku'a huvame hunka eri'negeno, ana nofima hu'neazana eme apaseno. Savri a'mo'ma nofima hanigenoma mago'mo apasegahue'ma hanigenka, aza hu'na apasentegahue huno kamiania zana erio. ¹⁷Kumzafa kave'mo'a haganentake hugahianagi, refuzufupe havemo kagipi aviteno kagi traga hiankna henka'a hugahie. ¹⁸Antahi'zana vahepinti erintenka erizama eri antahizana retro huo. Hagi knare antahi'zama mago'mofompinti'ma e'orinesunka hatera ovuo. ¹⁹Vahe zamagenkema hu vahe'moza vahe'mokizmi oku'zana hu ama nehaze. E'ina hunegu vahe zamagenkema hu vahe enena tragotenka omanio. ²⁰Nerera nefama huhaviza huntesia vahe'mofona tvi'amo asu hanigeno kumazu hanimpi maniankna huno frigahie. ²¹Arera a'fama ofri maninesigeno'ma erisinti haregahanema hu'nesia zama ame'ama huno erisia mofavremo'a, atuparega asimu'a omanegosie. ²²Kefo avu'avama hugante'sagenka anahukna huna nona huzamantegahue osuo. Hagi avega antenegeno Ra Anumzamo kaza huno ana knazana erino. ²³Mago'azama mizaseku'ma hanigeno kna'ama refako huno kezama (skel) erinteno refako hu so'e osu avu'avazana, Ra Anumzamo'a avesra huno agonete. ²⁴Vahe'mo'ma mika zama hiazana, Ra Anumzamoke azeri ante fatgo nehie. Inankna huno mago'a vahemo'a agra'ma nehia zana keno antahino hugahie? ²⁵Kagesa antahi ankeretenka Anumzamofontera huvempa huo. Ame'ama hunka huvempama hutesunka henka'a anama hu'nesana kegu kagesa antahintahi nehunka kagraka'a kazeri haviza hugahane. ²⁶Ama' antahizane kini ne'mo'a kefo zamavu'zamava nehza vahera witi hona'a hareno eriherahe hianka huno rezaganeno ke ama huteno, henka knanentake havenu witi'a refuzafupeankna huno knazana zamigahie. ²⁷Ra Anumzamofu lampe tvi'mo'a, vahe'mofu kantu agu'afi ufreno mika kefo agu'agesama me'neana hakeno eri ama nehie. ²⁸Kini ne'mo'ma vahe'mokizmima avesi nezamanteno knare avu'ava huzamantesiana, agra knare huno mani'nenno, zaza kna kva eri'zantera manino vugahie. ²⁹Nehazave ramimofona hanave zamimo ra zamagia nezamie. Hianagi ranra vahera efe'zmazoka nege'za vahe'mo'za husga hunezmantaze. ³⁰Hazenkema hania vahe'ma knokeve'ma ami'zamo, kefo avu'avazana ahenati netreno, agu'a azeri agru hugahie.

21 ¹Tima eriante fatgo'ma higeno kama'are vu fatgo hiankna huno, Ra Anumzamo'a kini vahe'mofu agu'agesa azeri antefatgo nehigeno, Agri avesite nevie. ²Vahe'mo'za maka zamavu'zamavama nehaza zankura, fatgo avu'avaza nehune hu'za hugahianagi, Ra Anumzamoke zamagu'a refako huno nezamage. ³Ra Anumzamofu avurera fatgo avu'ava zane, fatgo huno refako hu'zamo'a, kre sramnama

vu zana agatere'ne. ⁴Vahe'ma ke fenkamite zane, avufga ra hu'zamo'a, nena raga'a rentesiana kumire. ⁵Knare huno antahintahima retro huteno, hanavetino erizama erizamo'a, rama'aza erifore hugahie. Hianagi ame'ama huzamo'a, amunte omane vahe manigahie. ⁶Havigereti eri fenomo'a, hampogino kirga hiankna huno fanane nehuno, frikante kavreno vugahie. ⁷Kefo avu'avama nehaza vahe'mokizmi hazenke'zamo'a, zamavazu huno zamazeri haviza hugahie. Na'ankure zamagra fatgo zamavu'zamava huzankura, zamavesra hunentaze. ⁸Hazenke zamima me'nea vahe'mo'za mani fatgo hu'za nomanize. Hianagi hazenke zamima omane vahe'moza fatgo avu'avate nemanize. ⁹Fra vazivava a'ene mago nOMPI omanino, agraku'ma nomofu fegu'a mani'zamo'a, knare hu'ne. ¹⁰Kefo avu'avama nehaza vahe'moza, kefo zama huzankuke zamavenesie. Hagi tava'ozmirema nemaniza vahe'ra zamazeri haviza nehaze. ¹¹Vahe'ma huhaviza'ma hu vahe'ma knoma amiza azeri fatgoma hazageno'a, antahi ama osu vahe'moza negeza ama' antahi'zana erigahaze. Hianagi knare antahizama eri'nesaza vahe'mo'za zamazeri fatgohu kema zamasamisage'za mago'ene antahi'za erigahaze. ¹²Ra Anumzamo'a fatgo hu'neankino, kefo vahe'mo'ma noma'afima hia avu'ava'zana keno antahino nehiankino, ana vahera zamazeri haviza hugahie. ¹³Mago vahe'mo'ma amunte omane vahe'mofo kezanke'ma antahi omisimofona, agrama mago zanku'ma upama hu'nenno kezatisige'za antahi omigahaze. ¹⁴Rimpama hegante'nesia vahe'ma oku'ama musezama amizamo'a arimpa ahagante'nesia zana eri fru hugahane. ¹⁵Vahe'mo'ma fatgo huno refako hu avu'avama hanigeno'a, fatgo vahe'mo'za muse hugahaze. Hianagi kefo avu'avama nehaza vahe'mo'za, tusi koro hugahaze. ¹⁶Mago'mo'ma antahi ama'ma hu antahizamofu kama atreno havifima vanimo'a, frino ko'ma fri'naza vahe'ene umanigahie. ¹⁷Knare kave neneno, tima neno muse zanku'ma mika zupama avesivava hanimo'a, zgo'amo'a vgaresigeno amunte omane vahe manigahie. ¹⁸Fatgo avu'avama nehaza vahetema hazenkema esiana, kefo avu'avama nehaza vahe'mo'za zamagri nona eri'za ana hazenkea erigahaze. Hagi hazenke vahe'mo'za fatgo vahe'mofo nona eriza knazana erigahaze. ¹⁹Mago ne'moma kehakare nehuno, rimpa hevava nehania a'amofoma atreno ka'ma kopima umanisiana knare hugahie. ²⁰Ama' antahi'zama eri'nesia ne'mo'a, knare feno zantamine olivi masavena noma'afina erivitegahie. Hianagi neginagi antahizane vahe'mo'za, mika fenozazmia atre vganeraze. ²¹Mago vahe'mo'ma fatgo avu'ava ene avesima ante avu'ava'ma hankavetino avaririsimo'a, knare nomani'zanki, fatgo avu'ava'ene ra agine erigahie. ²²Ama' antahi'zane ne'mo'a, hanave vahe'mokizmi rankumara ha' huzamanteno e'nerino, hanave vihugu'ma amuha'ma hunemiza vihua tapage hutregahie. ²³Iza'o kema hu'zampima agi'ene agnefu'nanema kvama hanimo'a, hazenkea e'origahie. ²⁴Vahe'ma

huhavizama huzamante vahe'mo'a, avufga ra nehuno, vahera zamage fenkami netreno, agra'a avufga erisga hu'zanke nehie. ²⁵Eri'za e'ori feru vahe'mo'a mika zama eri'zankura avesi'avesi nehuno, frigahie. Na'ankure agra azana eri avako huno, erizana e'orine. ²⁶Feru ne'mo'a mika'zama eri'zankura antahi'vava nehie. Hianagi fatgo ne'mo'a agra'agura ontahino, mika feno'zana vahera nezamie. ²⁷Kefo avu'ava ene vahe'mo'ma kresramnama nevia zankura, Ra Anumzamo'a agoteno avesra hunenteankino, kefo zamagu'zamage'saretima eri'za aza vahera mago'ane agatereno avesra hunezamante. ²⁸Keagama refako hu tratema havigema huno hu ama'ma huntesimo'a, frigahie. Hianagi tamage kema hanimofona, ana agenke'amo'a mevava huno vugahie. ²⁹Kefo avu'avama hu vahe'mo'a, havige huno nagra knare vahe mani'noe nehie. Hianagi fatgo vahe'mo'za zamagesa antahi so'e hute'za kana nevaze. ³⁰Ama' antahizana eri'nenka, antahi ama'ma hu antahizana erigahananagi, Ra Anumzamofoma ha'ma rente'sanana ana antahi zankamo'a amne zankna hugahie. ³¹Ha'ma huzana hosi afura azeri retro hugahazanagi, ha'ma azeri'agatere zana, Ra Anumzamofontegati egahie.

22 ¹Vahe'mo'ma knare kagi'ma kami'zamo'a, rama'a fenoma ante'zana agatere'ne. Hagi vahe'mo'ma kagrima kavesigante zamo'a, koline silvanena agatere'ne. ²Feno vahe'ene amunte omane vahe'enena, Ra Anumzamo ana tarega vahera tro huzanantege'ne mani'na'e. ³Ankere antahizane vahe'mo'a, hazenke zama ne'esigeno negeno maniganesigeno agateregahianagi, knare antahizama omane vahe'mo'a, hazenkema fore'ma nehanigeno'a, negeno nevuno ana hazenkezana erigahie. ⁴Agra'a avufga anteramino nemanino, Ra Anumzamofonku'ma koro hunteno, agorga'ama mani'zamo'a, rama'a fenoza nentesankeno kagi'a husga nehanagenka, zaza kna manigahane. ⁵Akrahe krahe avu'ava ene vahe'ma nevaza kampina, ave'ave zane vahe'ma azeri kukone me'ne. Hianagi iza'o agra'ama kegvama himo'a afete nemanie. ⁶Mofavreka'a knare kantema vuza rempi humigeno knare kante nevuno, rama hanuno'a, ana avu'avara atreno rukrehe osino. ⁷Feno vahe'mo'za zmunte omne vahera, kegva hunezamantaze. Hagi zgoma nofi'ma nehaza vahe'moza, zago'ama nofima haza ne'mofo kazokazo eri'za vahe nemanize. ⁸Kefozama krinenimo'a, henka nezama'a hazenke'za kafigahie. Hagi vahe'ma zamazeri havizama nehia himamu'amo'a, vgaregahie. ⁹Iza'o zamunte'ma omane nagama muse zampintima ne'zama amisia vahera, Ra Anumzamo'a asomu huzamantegahie. ¹⁰Kehu haviza hu vahera zamahe anati atrenkeno, vahe'ma huhavizama hu'zane, ha'ma hu'zane, fragema hu'zana vgareno. ¹¹Agu'amo'ma agru nehanigeno, fru kema huzanku avenesisimo'a, kini ne'mofo rone'a manigahie. ¹²Ra Anumzamo'a antahizama erizante avu'a anteno kegva nehianagi, hazenke vahe'mofo kea erinetre. ¹³Feru vahe'mo'a amanage nehie, megia laioni

mani'neankino, vanuana nahe frigahie huno nehie. ¹⁴Savri a'mofo agipintima nea kemo'a, muri kankna hu'ne, izano Ra Anumzamo'ma arimpa hentesimo'a, ana muri kampi tamigahie. ¹⁵Mofavremofu agu'afina negi'nagi avu'avazamo avitegahianagi, kanoma amino azeri fatgoma hu'zamo ana avu'ava zampintira azeri arukrahe hugahie. ¹⁶Fenzami mago'ane eri rama'a hunaku'ma zamunte omane vahe kna zamiza zamazeri haviza nehaza vahe'ene, feno vahe'ma musezama nezamiza vahe'mokizmia, zamuntera omanegahie. ¹⁷Knare antahizane vahe'mofo kere kagesa antenka antahise nehunka, nagrama rempima hugamisuaza huo. ¹⁸Na'ankure ana kemo'a knare hu'neankinka kagu'afi erintenankeno ana kemo'a, kagitera me'nena kea hutere hugahane. ¹⁹Nagra menina rempi hunegamugu, nentahinka Ra Anumzamofonte kagranena kamentinti huo. ²⁰Nagra 30ti'a knare kegaga krentegantenofina, kavumro kene, antahiza eri zamofu naneke kregaminoankinka, ²¹ama ana kereti tamage kea rempi hunka antahinenka, iza'o hugantenigenka e'nesamofona fatgo'are kenona ome asamigahane. ²²Zamunte omane vahe'mokizmi zana ohanareho, na'ankure zamagra zamunte omane vahe mani'naze. Hagi zamunte omanesige'zama upama hu'nesaza vahera, keagarera zamavrenteta zamazeri havizana osiho. ²³Na'ankure Ra Anumzamo'a, zamunte omane vahera zamahokeno zamazeri havizama hanaza vahe'mokizmia, zamazeri haviza hugahie. ²⁴Arimpa hevava vahera rone huonto, ame huno rimpape vahe enena tagro oto, ²⁵ru ana vahe zamavuzmava enerisankeno, kukomo kazeriankna huno kagu'a azeri haviza hugahane. ²⁶Mago vahera huvempa hunka mago'za hugantegahue osuo. Hagi ru vahe'mo'ma nofima hu'nesigenka, ana nofima hu'nea zana nagra vakanentegahue hunka osuo. ²⁷Anama nofima hu'nesaza zama apa osesanke'za miko zanka'ane, tafe'ma masinkama nemasesana zanena eri vgaregahaze. ²⁸Tamagehe'mo'za ko'ma re'nenaza kanagi kana, akasi kantutretma rumofu mopa eri havia osiho. ²⁹Eri'zama eri antahizama eri'nea ne'mofo erizana negano? Agra kini vahe'mokizmi eri'za vahe nemanino, agi omane vahe'mofo eri'za vahera omanigahie.

23 ¹Rankva ne'ene kave negahane hu'za kagima hanagenka umani'nenka nezama nekura, antahi so'e hutenka kva hunka ne'zana no. ²Rama'a ne'zama ne' vahe'moka, kagraka'a knankenofi kazinuti taga hiankna nehane. ³Rankva ne'mofo ne'zamo'a, ksanea osino. Na'ankure ana kaveteti, regavatga hugahie. ⁴Feno vahe'ma mni'zankura maragu'zatinka kazeri havizana osunka, ama' antahiza e'nerigeno feno vahe'ma mani antahizamo'a kazeri havizana osino. ⁵Kavuma keramage'ma hanankna huno, feno zankamo'a fanane hugahie. Na'ankure agekona eri atareno tumpa namamo hareno hampompi mareriankna huno, afe hugahie. ⁶Veva osu ne'mo'ma ne'za emeno huno kagi hania nezantera ovuo. Knare ne'za krentesia nezantera, ksanegura osuo.

7Na'ankure agra e'inahukna ne'kino, nama'a mizana hugahie antahintahi hakare nehuno, ne'zana nenenka tina no hugahianagi, agri agu'amo'a, kagri'enena omane'ne. 8Anama ne'nana nezana amu'atinetrenka, nanekema hu so'e huntenana zamo'a, amanezankna hugahie. 9Neginagi vahe'ma mani'nenafina keaga osuo, na'ankure ama' antahizanteti hanana kea, huhaviza hugahaze. 10Tamagehe'mo'za koma re'ne'naza kanagi kana akasi kantugma osuge, megusa mofavre'mofo mopa kavunofi ahenka e'orio. 11Na'ankure zamahoma ke'nia Nera hankave Ne' mani'neankino, tamagrira keaga Agra'a hurmantegahie. 12Kagu'areti kavumro kea nentahinka, antahizama kami kere kagesa antenka antahio. 13Mofavrema azeri fatgoma huzankura, korera osuo. Kagrama knoma amisanana ofrigahie. 14Azeri fatgo hu knoma amizamo'a, fri vahe kumapima vuzankura agu amena agu'vazigahane. 15Mofavre'nimoke, ama' antahizama erisiana, Nagri nagu'amo'a muse nehuno, 16kagipinti'ma fatgo ke'ma antahi'sugeno'a, mika nagu'amo'a muse hugahie. 17Kumi vahe'mokizmi zamavu'zmavakura kegasanea osuo. Hianagi Ra Anumzamofonku kore'ma hunteno agorga'ama manizanku maka kna, kagesa antahio. 18Henkama fore hania zankuma tamage hunka kagesa nentahinka, amuhama nehana zamo'a amnezanknara osugahie. 19Mofavre'nimoka, ke'ni'a antahinka knare antahi'zana erinka, fatgo kante kagu'a antenka vuo. 20Rama'a aka'tima nene'za neginagi nehaza vahe'ene, rama'a zgagfamofa ame'are'ma nehaza vahe'enena, trago oteho. 21Aka tinte vahe'ene ra'ma'a nezama ne' vahe'mo'za, zmunte omne vahe manigahaze. Hagi avu'ma mase vava vahe'mo'a, kukena zamimo'a tagato tagatu hugahie.

Savri monko avu'ava'ene a'mofonku kva hu naneke

22Kasema kante'nea negafa ke'a nentahinka, negrerama tvavaresigenka kafenkamia otro. 23Tamage ke'ma mizase'nenunka zgorera otro, ama' antahizanki, huoguma rempima hugamisiazanki, antahi'ama huno refkoma hu'zana erio. 24Fatgo avu'avama nehia mofavremofa nefa'a, tusi'a muse hugahie. Hagi ama' antahiza eri'nea mofavre'agura, nefa'a muse huntegahie. 25E'inahu kavukva hunka negrera kfama azeri muse nehunka, ksegante'nea negrerana azeri muse huo.

26Mofavre'nimoke, kagu'tumoka'a Nagri nenaminka, kvuma ke'sanana, Nagri navu'navate kento. 27Monko avu'avama huno Savrima huno vanoma nehia a'mo'a, murigankna higeno, vema ante'nea a'mo'ma savrima huno vanoma nehia a'mo'a, osi tinkerigna huno urami'neankino, ana tinkerifima uramisaza vahe'mo'za haviza hugahaze. 28Ana a'mo'a kumza vahe'kna huno kazeri savri hunaku kaveganteno mni'neankino, venenea azeri savri hanigeno, mani fatgo huno a'are'ma omani'zamo'a ra hugahie.

Rama'a negi ti nenaza vahe'mokizmi naneke

²⁹Iza hazenkefina mni'vava higeno, iza asu zampina nemanie? Iza ke hakarea nehigeno, iza hara azeri o'netie? Iza avufamo hazenkea erigeno namuna nere? Iza avumo korankera nehie? ³⁰E'i anazama fore'ma nehiana zazate'ma aka tima nenaza vahe'ene, hanave waini tima tagi havia hu'za ne'naza vahe'tmimofonte fore nehie. ³¹Atregeno wainimo'ma korankrema nehuno, agrema'amo taferopinti krakra huno mrenerino, knankente'ma fruma huno urami'nia zamo'a, kazeri kasanea osino. ³²Hianagi henka'a hamu osifavemo kreankna nehuno, ha' osifavemo kamprino avuatgazama'a regatati huganteankna hugahie. ³³Kavumo'a ruzahu ruzahu'za negenkeno, antahintahi kamo'a savri nehina, kema hanana kemo'a savri hugahie. ³⁴Hagi e'inama nehanana, hageri amunompi me'nea ventefi masenankeno kranto kranto huno kazeri tore tore hiankna nehuno, ventemofu seri rente zafare mani'nankeno, zahomo kavregantugama hiankna hugahane. ³⁵Anage hugahane, nahazanagi nata onkrine hunka nehunka, kanona namizanagi antahina kena osu'no'e hugahane. Hanki nagrama ete otisuna, mago'ane ana tina negahue nehane.

24 ¹Havi vahe'mo'ma hania avu'ava zankura kegasane huge, ana vahe'enema tragotenka mani'zankura, kagesa ontahitfa huo. ²Na'ankure antahiza zamifina vahe'ma hazenke'zami antahizamo avitegeno, zamagipintima atineramia ke'mo'a, hazenke erinte kege nehaze. ³Knare antahizanteti nona neginka, ama' antahizanteti eri hanavetigahane. ⁴Antahi'zama erinenanteti, knare fenozane zgo'amoma mreri zantamina nonka'afina erinte avitegahane. ⁵Ama' antahizane vahe'mo'za rama'a hanave erizageno, antahizama eri vahe'mo'za mago'ane hanave e'nerize. ⁶Ha'ma hu'zante'ma ama' antahizama hunka e'orinesunka, hatera ovuo. Na'ankure rama'a vahe'mo'zama ha'tema vanana kavumroma kantensagenka, hara azeri agateregahane. ⁷Knare antahizamo'a mesga hu'neanki'za, neginagi vahe'mo'za erigara osu'nazankiza, rankumamofu kafante'ma kva vahe'mo'zama atruma hu'zama kema hanafina, mago kea osugahie. ⁸Kefo avu'avazama hu antahizama retro'ma nehaza vahe'mokizmigura, hazenke vahere hu'za nehaze. ⁹Neginagi avu'avama hu'zama retro'ma hanazana, kumi nehaze. Vahe'ma huhavizama hunezmantea vahe'mofona, vahe'mo'za zamavesra hu'za zamagote'nentaze. ¹⁰Knazampima unefrenka hanavema otisankeno'a, hanaveka'a omanegosie. ¹¹Havigema hu'za zmahe frinaku'ma hanaza vahera, zamaza huta zamavreho. Hagi zamahe frinaku hanaza vahera, zamaza huta zamavreho. ¹²Antahi'nesunka ontahi'noe hunka havigea osuo. Na'ankure Anumzamo'a kagu'a kageno antahino nehuno, kagu'a kegva hunegantea ne'mo'a, kagu'a

kageno antahino osugahie hunka osuo. Miko vahe'mokizmia zamagrama hu'nesaza znavu'znavate anteno mizana zamamigahie. ¹³Mofavre'nimoka tume rima'a no, na'ankure knare hu'neankino, kagitera haga hugahie. ¹⁴E'i anahukna huno, ama' antahizamo'a kagu'afina haga hugahie. Hagi hakenkama erifore'ma hanankeno'a, henkama erigahue hunka amuhama nehana zamo'a, amnezanknara osugahie. ¹⁵Kefo vahe'moka fatgo vahe'mozama nemaniza nontera, zmazeri haviza hunakura kva hunka omanio. Hagi fatgo vahe'mo'za nemaniza kumara eri havizana osuo. ¹⁶Na'ankure fatgo vahe'mo'za, 7ni'a zupa evuramiga hazanagi, ete otigahaze. Hianagi kefo avu'avama nehaza vahetera, mago hazenkema esuno'a, eme zamazeri haviza hugahie. ¹⁷Ha'ma renegantesaza vahe'ma evuramisagenka, musena osuo. Hagi tanafama hanaza zankura, musena osuo. ¹⁸Na'ankure Ra Anumzamo'a ana'ma hanankeno'a, negageno musena hunoganteno arimpahe zama'a anamofontetira eritregahie. ¹⁹Kefo vahe'mofo avu'avakura korera hunka antahintahi hakare nosunka, ana havi zamavu zamavakura kegasanea osuo. ²⁰Na'ankure kefo zamavu'zama'ene vahe'mokizmia, henkama knare huzama mani' mani'zana omnesige'za, lamu tavi'mo asu hiankna hugahaze. ²¹Mofavre'nimoke, Ra Anumzamofone kinimofonena koro huneznantenka zmagorga nemaninka, ha'ma reznantesaza vahe'enenamagopina tragoteta omaniho. ²²Na'ankure e'inahu vahetera, tusi'a hazenke zamo ame huno egahie. Ra Anumzamo'ene Kini ne'mo enema zamisaza knazana, mago'mo'e huno ontahitfa hugahie. ²³Ama' antahizama eri'naza vahe'mo'za amanahu ke hugahaze. Nanekema trate refkoma hanuza magomofonkukera osugahaze. ²⁴Iza'o kefozama hu'nesia neku'ma, kefozana osune hunoma hanige'za, rama'a vahe'mo'za anagama hania ne'kura, huhaviza hunentesageno, kokankoka vahe'mo'za antahi haviza huntegahaze. ²⁵Hu'neanagi iza'zo kefoza hu'nesia neku'ma, kefoza hu'ne huzama huamama hanimo'a, rama'a asomu erino rama'aza antegahie. ²⁶Tamagama huno ke nonama hu'zamo'a, e'i knare kvate knampaka'amo kanukino kantako huganteankna hugahie. ²⁷Kotazana hozama antesanaza retro hunka hoza antetenka, henka nonka'a kigahane. ²⁸Tava'onka'arema nemanisimofoma trate'ma kegagama hunentezama, kenana zanku nehazafi huama huo hanagenka, havigea hunka hazenkema osu'nesia zankura, hazenke hu'ne huonto. ²⁹Hagi zmagrama hunantesaza zana nona huna huzamantegahue hunka osuge, mago'mo'ma havizama hugantesiana, nona hu'na havizana huntegahue hunka osuo.

Feru vahe'mofo naneke

³⁰Nagra feru ne'mofo hozafine antahintahi'a omane ne'mofo waini hozafi agaterena nevu'na koana, ³¹ave've trazamo'ene hozafi inozamo hageno ana hoza refitegeno, have keginama hugagi'nea zamo'a

fraguvaziramine. ³²Ana zama nege'na nagesama nentahugeno'a, mago'aza rempi hunamine. ³³Osi'agna nagra navura masehimarege, osi'agna masege, osi'a nazana anamagina manisga huge'ma hanugeno'a, ³⁴musufa vahe'mo'za mika fenozmi kumzafa sage'za, mika zazmimo'a ame huno vgaresige'za, zamunte omane vahe maniankna hugahaze.

Mago'ane Solomoni knare antahintahi'amofa naneke

25 ¹Ama'i Solomoni knare antahizamofa naneke, Juda vahe kini ne' Hezekia eri'za vahe'mo'za eriza krente'naza naneke. ²Ra Anumzamo'a rama'a zama antahizama'afi erifrakinegu, ra agi nemune. Hagi kinimo'a anama frakinea zama hakeno erifore nehigeta, agrira ra agi'a amita husga nehune. ³Monamo onagamu me'geno, mopamo'a ufenkamu megeta antahita keta nosunankino, e'inahukna kante kini vahe'mokizmi antahintahizmia tagra antahita keta osugahune. ⁴Silvama kre'za eri avusese hazageno, knare'ma hige'za anantetira zgo'amo mareri zantamina tro nehaze. ⁵Kefo avu'avama hanaza vahe'ma kini ne'mofa kumapintima zamahenati atresazana, agrama kegvama hu'nea kumamo'a, hanavetino fatgo huno megahie. ⁶Kini ne' avurema emanisunka, nagra ra vahe'mani'noe hunka kavufga ra nosunka, zmagine vahe'mokizmi tratera eomanio. ⁷Akoheno mani'nenkeno kema huno avrenagamute zamo knarera hu'neanki, agine vahe'mofa avufima hugantesigenka anama mani'nenana tra'ma atrenka urami zamo'a kagaze hugahianki, antahinka kenka huntanka fatgoza huo. ⁸Ame hunka naneke hu tratera magomofona avrentenka kehara huonto. Na'ankure tava'onkarema maninaza vahe'mo'za, ana nanekeka'ama eriana huno kazeri kagazema haniana, atuparega na'a kagra hugahane? ⁹Kagrama tava'onkarema nemanisimo'enema ke ha'ma nehanunka, magomofa oku'a avu'ava'amofa naneke hu amara osuo. ¹⁰Henka'ama vahe'mo'za antahisuza, frakiza hazankeka kagra franokine huge, kazeri kagaze nehu'za mika zupa antahi haviza hugante vava hugahaze. ¹¹Hagi vahe'mo'ma knare antahi'zama kna fatgo'arema hu'ama'ma hanigeno'a, ana ke'mo'a kolire tro hunte'naza epoli zafa rgamo silva zuompafi meankna hu'ne. ¹²Knare antahizantetima azeri fatgoma nehanigeno agesa anteno antahisimo'a, kolire tro hunte'naza avasaseza agesafi anteankna hu'ne. ¹³Kema erino esia ne'mo'ma, ome huo huno huntesisigeno esia kema eme fatgohuno anankema hu ne'mo'a, hozafinti neza hamare knare ata ko'mo rufu hiankna nehigeno, kva'amofa agu'amo'a fru nehie. ¹⁴Mago vahekuma museza kamigahue hunoma avufga ra hu kazigati huvempa hunteteno, anazama omisia vahe'mo'a, ko aruku zaho e'nerino hampo ko atuno hanintiri huteno, kora oriankna nehie. ¹⁵Hagi ame hunka krimpama ohe'zamo'a, kva vahera rimpa azerifru hunka, kagrarega avrentegahane. Antefru hunka huke'mo'a, ha' frama hu'zana mika azeri agateregahane.

16 Tume'mofo tima'amo'a haga hu'neanki, nenunuka avamente no, rama'a nesanana amu'atigahane. 17 Tva'onkarema nemanisimofo nontera hakare zupa vuvava osuo, anama hanankeno'a musema hunoma negavreanknara osugosianki, avesra hugantegahie. 18 Tava'onkarema nemanisimofoma havigema huntanka, agenkema hanana zamo'a, kumpa knonu aheankna nehunka, kazinteti avufgama akafriankna nehunka, keve aheankna hugahane. 19 Kagrama kaza osuga vahe'ma antahinemisankeno havi knama esigeno'a, naza hugahiema hananana, ave'neneno ata negrifi ne'zama neankna nehunka, agamo haviza hu'nea ne'mo revazamu revazamu huno veankna hugahane. 20 Vahe'mo'ma asunku zampima mani'nenigenka muse zgamema hananana, ana asunku zampi mani'nea vahe'mofona, zasi knafi nakreku'a zafi atreankna nehunka, aka tinu avufga taga hu'nefi tagi atreankna hugahane. 21 Ha' vahekamofoma aga'zanku nehanigenka ne'zama nesia zana neminka, tinku'ma avenesinigenka tina amigeno neno. 22 E'inhahu'ma hanankeno'a, teve tankanuzza asenifi hampagenteankna hanankeno, agra'a havi avu'ava zama'agura agaze nehanigeno, Ra Anumzamo'a mizana kamigahie. 23 Vahe'ma amefiga ke'ma hu kemo'a, noti (north) kazigati zaho'mo ko atufeno eankna huno, ana vahe'mofontera arimpa ahe'za erino esigeno, avugosamo'a zahe hugahie. 24 Fegi'a anaga nomote kagraku manizamo'a, nogu'afima kehakarema nehia a'enema manizana agaterene. 25 Afete kumateti knare'zamofa agenkema egeno antahizamo'a, tinku avesinere zasi ti amigeno neankna nehie. 26 Fatgo ne'mo'ma kefo avu'ava ene ne'ma, avaririno kefo avu'avama ome haniana, knare tinkerifi agamunke timo ufreno eri haviza hiankna hugahie. 27 Vahe'mo'ma ra'ma'a tumerima ne'zamo'a, knarera osu'ne. Vahe'mo'ma agra'a ra agima erizanku'ma mraguzamati'zamo'a, knarera osu'ne. 28 Iza'o, rimpa aka he'zama azeri aravama ohesiana, mago ra kuma'mofo have keginamo fragu vaziramiankna hugahie.

26 1 Neginagi vahe'ma ragima amizamo'a, zage knafi ko' ariankna nehigeno, ne'zamo afure knafi ko' ariankna huno knarera nosie. 2 Magomo'ma hazenkema osu'nenigeno kazusi hunte kema hanigeno'a, ana kazusi kemo'a kisave namamo mika zupa mnigsa osuno hareno vano vano nehiankna huno, vahetera forera osugahie. 3 Hosi afura sefu knonu ahe'za azeri antefatgo nehazageno, donki afumofona aeni zamagipina rentenaza zante zamavazu huza zmazeri fatgo nehaze. Hagi neginagi vahera knonteti zamagumpi zamahe'za zmazeri fatgo hugahaze. 4 Neginagi vahe'mofona neginagi naneke zamirera kenona huozamanto, anama hananana zamagri kna hunka neginagi vahe manigahane. 5 Antahiso'e hutanka neginagi vahe'mo'za, neginagi nanekema hanaza nanekerera, kenona zmia huzamanto, ru zamagra antahisazana knare antahiza eri'none hugahaze. 6 Neginagi

vahe'mofoma katogema huntensakeno kema erino vaniazamo'a, mago kaga akafri atreankna nehuno, avuatga ti neankna hugahane. ⁷Neginagi vahe'mo'ma knare nomanizamofomo nanekema hu'zamo'a, vahe'mofoma frino sti'nea agamo eri'za e'oriankna huno, ana nanek'e'amo'a erizana e'origahie. ⁸Neginagi antahizane vahe'ma ra zamagima zmizamo'a, kumi'atifima have erinteno ahe atrenaku anteankna nehie. ⁹Neginagi antahizane vahe'mozama knare nomanizamofomo nanek'e hanazana, negi ti neno neginagi hu'nea vahe'mo, ave ave nofi azampi azerineno traka truku huno vano hiankna nehie. ¹⁰Neginagi antahizane vahe'ene karankama enevanaza vahe'ma zgorema eri'za erisazegu'ma zamavresia zamo'a, keve ome ahetre emehetre huno rama'a vahe zamaheankna hugahie. ¹¹Kramo'ma amu'ma atitrenere'ma eteno viaza hu'za neginagi vahe'mo'za koma nehaza neginagi zamavu'zmavara hutere nehaze. ¹²Neginagi vahe'mo'za amuhama hazazamo'a, ama' antahizane vahe'ma mani'none hu'za antahiza vahera zamagateneraze. ¹³Kampine ra kumamofomo kantamimpina ha' zga laioni manine hu'za feru vahe'mo'za nehaze! ¹⁴Kafamo'ma hantintinare'ma me'nenno anagino erigino hiankna hu'za, feru vahe'mo'za nemasaza tafe zamire, rukrahe rukrahe nehaze. ¹⁵Feru vahe'mo'a ne'zama ante tafepintira ne'zana erigahianagi, agipina erinteno nezankura avesra hugahie. ¹⁶Feru vahe'mo'a agraguma antahiana, 7nia knare antahizane vahera, nagra zamageterenoe huno nentahie. ¹⁷Rumozama ha' frama nehazafima, anintka huno kema hu'zamo'a, kramofomo agesare avazu huno viankna nehie. ¹⁸⁻¹⁹Tava'oma'are nemanimofoma revatga nehuno, kiza zokago ke hugantoe hunoma nehimo'a, negi ne'mo teve nerea keve ome ahetre eme ahetre hiankna nehie. ²⁰Hagege teve rampama omanesigeno'a, tevea rukru huno ontegahie. Hagi vahe zamefi kema hu'zama omanesigeno'a, ha' frama hu'zana omanegosie. ²¹Tevemo'a tanknuzare tevea nereno hagage teve rampare rukru huno tevea nereankna hu'za keframa vazi vahe'mo'za, ha'ma hu'zana eri agafa nehaze. ²²Vahe'ma amefi agenke hu kemo'a, haganentake ne'zankna hu'neankino, vahe'mofomo agu'afinka unefre. ²³Vahe'ma azeri havizahu antahizama kagu'afima me'negenka, amne kagitetima fru kema humisanana, mopa kavomofomo amega'a silva masave frenteno eri knare hiankna hugahane. ²⁴Magomo'ma avesra hunentesia vahe'mofomo amega agiteti avurera so'e ke humigahianagi, agu'afina antahi muginente. ²⁵Knare kema hanigenka ana kegura tamage hunka antahiomio, na'ankure agu'afina 7ni'a kasrino agote'zamo avitene. ²⁶E'i ana kefo antahizana frakigahianagi, mika veamo'za, kefo avu'ava'afi eama hanige'za kegahaze. ²⁷Iza'o kerima asentesimo'a, anama asentesia kerifi agra'a tamisigeno, iza'o havema rezahe huno mrenerinimofona, ana havemo'a ete eramino havema retufeno mrerino nevanimofona eme rehapatigahie. ²⁸Havi kema hu vahe'mo'a, avesrama hunentea vahera,

havige huno azeri havizahu ke hunente. Rumofu zante ke'neni masave kema hu'zamo'a, ruga'a vahera azeri haviza nehie.

27 ¹Okina e'inahu'za hugahue hunka kavufga rana osuo, na'ankure mago mago knamo'ma erinoma e'nia zana ontahinane.

(Jem 4:13-16)

²Atregeno ru vahe'mo'za husga hunegantena, kagra'agura husga osuo. Rurega vahe'mo'za husga huganteho, kagra'a kavufga husga osuo. ³Havemo'a kna higeno, kasepamo'a tusi'a knanentake hu'neanagi, neginagi vahe'mo'zama nehaza zamavuzmavamo'a, ana tarega zana agatereno tusi'a knanentake hu'ne. ⁴Rimpama ahe'zamo'a havizantfa higeno, asivazi zamo'a ti hageno eankna hugahianagi vahe'mofu zantema negeno arimpa haviza hu'zamo'a, tusia havizantfa hu'ne. ⁵Havi avu'avama hanigenkama amate huama huntanka azeri fatgo'ma hu'zamo'a, frakinkama avesima nentenka azeri fatgoma osanana zana agaterene. ⁶Knampa kamoma kazeri fatgo hukuma katama kami'zamo'a, ha' vahekamo regavatga huno kagi'ma antakoma hania avu'avara agaterene. ⁷Amu'ma hu'nesimo'a, tumemofu rima'a one atregahie. Hianagi agazanku'ma nehania vahe'mofona aka hu'nesia nezamo'agi, agitera haga hugahie. ⁸Nonkuma zamire'ma manisoe osu vahe'mo'za, nmamo'zama nozamire manirava osu kanke kankema hazankna nehaze. ⁹Kavesima kanten kavumroma ante'zamo'a, mnanentake masavemo'ene knare mnavovo zamo mnaviankna huno rone'amofu agu'a azeri muse hugahie. ¹⁰Roneka'ane negafa rone'amofona kamefira huozamio. Hazenkema e'nerisunka kazama hinogura negafu nontega ovuo. Tava'onkarema nemanisimofu nontega vu'zamo'a, afete'ma mani'nesia nagafu nontegama vu'zana ageterene. ¹¹Mofavre'nimoke, ama' antahiza e'nerigeno nagu'amo'a muse nehina, ana zamo'a knama namiza huhaviza hunenantaza vahera kenona zamia huzamantegahie. ¹²Knare antahi'zama me'nesia vahe'mo'a hazenkema agrite'ma eku'ma haniazana ko negeno, mani'ganenigeno agateregahie. Hianagi knare antahi'zama omane vahe'mo'a, avua onkeno ana hazenkefina vuno ufregahie. ¹³Zamagenka antahinkama osu'nesana vahe'mo'za nofi'ma kagripinti hugahue hanagenka, amanea ozaminka nakre kuzmia avame zama'a erinege'za, ana nofima hu'nesaza zana eme vakanegahie. ¹⁴Mago ne'mo'ma nanterama'afima kezatino, knare kne hunoma haniana, vahe'ma sifna aheankna hugahie. ¹⁵Ke fra nehuno kema huvavama nehia a'mo'a, nomo trovare huvava hiankna nehie. ¹⁶E'ina hu kna a'nema zamazeri ante fatgohu kema zamasamia zamo'a, zahoma azeriankna nehuno, masave fre'nea azanteti azerigeno arugraru vaziankna hugahie. ¹⁷Aeniretima, aenima kne'agonama nehiankna huno, vahe'mo'a, vahe'mofu antahintahia azeri fatgo hugahie. ¹⁸Fiki zafama

kegva hanimo'a, raga'a tagino negahie. Hagi iza'o kva'amofoma kegva hundesimo'a, ra agi agra erigahie. ¹⁹Timpima kvugosama kanankna huno, kavukavama hanazamo'a kagu'afima me'neaza eri ama nehie. ²⁰Fri vahe kumamo'ene, fri vahe'mo'za avima notazankna huno, vahe'mofo zmavenesia zamo'a zamura nosie. ²¹Koline, silvama azeri agruma hunakura, tusi'a tevefi kre'za negazanagi, vahe'mofoma rehenonegeana ragima amizanteti rehenonege. ²²Neginagi vahe'mofona neginagi avu'ava atresiegura, havereti witima refuzafupeno hona'a hareankna hunka zmahegahananagi, ana neginagi zamavu'zamavama nehaza zampintira, zamazeri otregahane. ²³Memene, sipisipi afukamozama nemaniza nomniza zamia rezagenka ke so'e hunka negenka, kagu'areti hunka kegva huzamanto. ²⁴Na'ankure, fenozamo'a mevava osanigeno, ragima erizamo'a mago naga nofitera meno ovugahie. ²⁵Trazama akafri atresigenoma kasefa hagesigeno agonaregati trazana erinoma ufresigeno'a, ²⁶sipisipi afu'mo'zane meme afumo'za nenesageno, sipisipi afumofona azoka'aretira kukena hatino nentanino, meme afura mopama mizasega'are zgorera atreno zagoa erigahie. ²⁷Hagi meme afumofa ami rima'a, rama'a me'nenkeno agrane noma'afima nemaniza naga'amo'zane nenesageno, kazokzo eri'za mofane'amo'za nesazama'anena megahie.

Kegva huno manizamofa naneke

28 ¹Kefo zamavu zamava'ma nehazamokizmia, vahe'mo'za zamarotgo nosazanagi, kore nefraze. Hianagi fatgo zamavu'zamava'ma nehaza vahe'mo'za, laionimo nehiankna hu'za hanavetiza nemanize. ²Mago kumapima vahe'mo'ma mago rimpama hu'zama omanesigeno'a, rama'a kva vahe fore hugahie. Hianagi antahizane vahe'ene antahi ama hu antahizane vahe'ma maninesigeno'a, maka zamo'a knare huno vugahie. ³Amunte omane vahe'mo'ma, amunte'ma omane vahe'ma azeri havizama nehiazamo'a, e'i ranko aruno hozamofa eri haviza hiankna nehie. ⁴Kasegema ruhantagi vahe'mo'za, kefo avu'avazama nehaza vahekura husga hunezmantaze. Hianagi kasegema nevaririza vahe'mo'za, kefo vahe'mokizmia ha' renezmantaze. ⁵Kefo zamavu' zamavama nehaza vahe'mo'za, fatgo huno refkohu avu'avazana antahi amara nosazanagi, Ra Anumzamofonkuma nehakamo'za makazana antahi amara nehaze. ⁶Amunte omane vahe'ma manineno fatgoma huno manizamofa, havi avu'avatetima feno vahe'ma manizana agatere'ne. ⁷Kasegema amage'ma ante mofavre'mofona, ama' antahiza agripina me'ne. Hianagi nezama nehana hu vahe'enema tragoteno manisia ne'mo'a, nefana ra agaze erimigahie. ⁸Zagoma agrama trohu kazigatima ra zgo agima ahentesia vahe'mofona, ana zagomo'a agri kupina omanegosianki, zamunte omane vahe'ma zmavesinte'za kegvama huzmantesaza vahe'mo'za erigahaze. ⁹Kasegema

antahizankuma amagena hunemia vahe'mofonena, Ra Anumzamo'a agri nunamuma antahizankura agotenente. ¹⁰Iza'o fatgo vahe'ma avreno kefo avu'avama hu kante'ma vanimo'a, agra'a asentenesia keri ramigahie. Hianagi tamagemu huno manisimo'a, knare'za erisanti haregahie. ¹¹Feno vahe'mo'a agra'aguma antahiana ama' antahizane vahe mani'noe huno hugahianagi, zamunte omane ama' antahizane vahe'mo'za, amane agrira age'za antahiza hugahaze. ¹²Fatgo vahe'mo'ma rankuma'mofoma kegvama higeno'a, mika ve'amo'a rimpa fru higeno, tusi muse nehaze. Hianagi kefo vahe'mo'ma kegvama higeno'a, mika vahe'mo'a franekie. ¹³Iza'o kumi'ama framakinimo'a, nomanizama'afina knarera osugahie. Hianagi kumi'ama hu ama nehuno, atreno arukrahe huno esimofona, Anumzamo'a asunku huntenu azeri so'e huntegahie. ¹⁴Maka knama Ra Anumzamofonku'ma koro huntenu agorgama mani vahe'mo'a, muse hugahie. Hianagi izano agu'amo'ma hanavema atisimo'a, hazenke erigahie. ¹⁵Kefo avu'avama nehia kva vahe'mo'a, zamunte'ma omane vahe'mokizmia, laionimo vahe aheno nenaku krafa hiankna nehigeno, beamo'ma vahe'ma aheno nenaku arotago nehianka nehie. ¹⁶Vahe'amofoma knama zami kva ne'mofona, ama' antahizana agripina omanene. Hianagi havigema huno fatgo osu kantetima fenoma erizanku'ma avesrama huntesia kva ne'mo'a, zazate manino vugahie. ¹⁷Mago vahe'ma ahefri'nesia ne'moma, vahe'ma ahe fri'nesia antahintahimo'ma knama neminkeno, nontema mani so'e osu vanoma nehina, aza osu atrenkeno frino. ¹⁸Tamage avu'ava huno manizamo'a, hazenkefintira kagu vazigahie. Hianagi iza'o mani fatgoma hunoma omanisimo'a, ame huno traka hugahie. ¹⁹Hanavema atino erizama mopafima erisimofona, ne'zama'amo'a avitegahie. Hianagi iza'o agafa'ama omanezante'ma avaririsimo'a, amunte omane vahe manigahie. ²⁰Tamagemu huno hugahue nehiazama fatgo hunoma nehia vahe'mo'a, rama'a asomu erigahie. Hianagi iza'o ame'ama huno feno vahe'ma maninaku'ma hanimo'a, hazenkefi ufregahie. ²¹Magomofokazigama nemanino magomofoma atrezamo'a, knarera osu'ne. Hianagi mago'a vahe'mo'za breti ankra'are, kumi avu'avaza eri fore hugahaze. ²²Araguke'ma antahi' vahe'mo'a, ame' huno feno vahe'ma manizanku agu'agesa nentahie. Hianagi henkama amunte omnesia zankura, keno antahino nosie. ²³Vahe'ma azeri fatgo hunaku azeri koneria ne'mo'a, vahe'mofoma masavenkema huzamante nera agatereneankino, henka rama'a vahe'mo'za agrikuke hugahaze. ²⁴Iza'o nerera nefa zama kumzafama neseno kumira nosue nehimo'a, agra mikazama eri havizama nehia vahe'ene tragonete. ²⁵Araguke'ma antahi vahe'mo'a, ha' azeri onetie. Hianagi Ra Anumzamofonte'ma amentinti nehanimo'a, nomanizama'afina mani knare hugahie. ²⁶Iza'o agra'a antahizanku'ma knare hu'neankina amne hugahuema hanimo'a, neginagi vahe kna nehie.

Hianagi iza'o ama' antahizampima vanimo'a, knazana agateregahie. ²⁷Iza'o amunte omane vahe'ma amisimo'a, mago zankura upara osugahie. Hianagi iza'o ozamage vahe kna nehuno zamaza osanimo'a, rama'a kazusifi manigahie. ²⁸Kefo vahe'mozama kvama maniza kegvama hzageno'a, mika vahe'mo'za fra'nekize. Hianagi ana kefo kva vahe'zgama frizage'za, fatgo vahe'mo'za ome rama'a nehaze.

29 ¹Iza'o rama'a zupama azeri fatgoma hanaza kema ontahino eritrenimo'a, ame huno havizantafa hanige'za, azeri fatgo hugara osugahaze. ²Fatgo vahe'mo'zama kvama manizage'za, mika vahe'mo'za muse nehaze. Hianagi kefo vahe'mo'zama kegvama hazage'za, zamarimpa kna nehu'za, kragi neraze. ³Ama' antahizama avesintea ne'mofo nefa'a muse nehie. Hianagi savri a'enema tagroteno nemanimo'a, fenoma'a atre vganere. ⁴Fatgo avu'ava ene kini ne'mofo kumamo'a, oti hanavetigahie. Hianagi masavema ami kazigatima ami'naza zagoma eri nemo'a, kuma'amofona eri haviza hugahie. ⁵Tava'o zamirema maniesia vahe'ma rezmatga hu'za masave kema huzmantaza zamo'a, zamagra'a kama nevazafi kuko anteankna nehaze. ⁶Kefo vahe'mofona krifumo azeri ankna huno kumimo'a azenerianagi, fatgo vahe'mo'za zgame hu'za muse nehaze. ⁷Fatgo vahe'mo'za zamunte omne vahe'mofo nomni'zankura antahi nezamiza kegva hunezmantaze. Hianagi kefo vahe'mo'za, anara nosaze. ⁸Vahe'ma huhavizama huzamante vahe'mo'za ra kumapi tevea taginteankna nehaze. Hianagi ama' antahizane vahe'mo'za, haframa hu'zana eri amane nehaze. ⁹Ama' antahizane vahe'mo'ma neginagi vahe'ma keagarema avrentesiana, ana neginagi ne'mo'a, arimpa ahentege ana ke'arera kiza zokago ke nehanigeno znarimpa fruzana omanegosie. ¹⁰Vahe'ma zamahe fri vahe'mo'za, hazenkezmi omane vahekura zamavesra hunezmantaze. Hianagi fatgo vahe'mo'za, hazenkezmi omane vahe'ma zamazeri so'ema hanaza zanku nentahize. ¹¹Neginagi vahe'mo'za zamarimpa he'zana azerirava nosazanagi, ama' antahizane vahe'mo'za, zamarimpa ahe'zana azerirava nehaze. ¹²Kva ne'mo'ma havigemofoma amagama antesiana, mika eri'za vahe'mo'za haviza hugahaze. ¹³Amunte omane vahe'ene, knama nezamiza vahe'enena, Ra Anumzamo'a ana taregamokiznima magozahu'zama, zanami'neana zanavuma ke'za zanamine. ¹⁴Zmunte omne vahe'ma fatgo huno refakoma huzmantesia kini ne'mo'a, zaza kna kinia manino vugahie. ¹⁵Mofavrema kanoma amino azeri fatgoma huzamo'a, ana mofavrea ama' antahiza amigahie. Hianagi kanoma amino azeri fatgo osu mofavremo'a, nererana agaze eri nemie. ¹⁶Kefo zamavu'zmava'ene vahe'mo'za kvama manizageno'a, kefo avu'ava zamo'a ra huno marenerie. Hianagi fatgo vahe'mo'za manine'za nezamagesage'za evuramiza haviza hugahaze. ¹⁷Mofavreka'a avumro antenka, azeri fatgoma hanankeno knare avu'avama hanigenka, karimpa fru nehina

muse hugahane. ¹⁸Ra Anumzamo'ma henkama fore'ma haniazanku'ma, eri ama huno kasnampa kema ozamasmisige'za, vahe'mo'za savri hu'za magoke kantera omanigosaze. Hianagi iza'o kasegema amage'ma antesimo'a, muse hugahie. ¹⁹Kazokzo eri'za vahe'mofona kegera hunka azeri antefatgo osugahane. Na'ankure ana kea antahi ama hugahianagi, ana kemofona amagera anteno anazana osugahie. ²⁰Zamagesa ontahi ame'ama kema nehaza vahera nezamagano? E'i ana vahera neginagi zamavu'zamava'ma nehaza vahe'mo'za zmaza huzama erisaza kamo'a zmagetere'ne. ²¹Osi'ma maninesigenka makazama hugnareke'ma hunte'nesana eriza ne'mo'a, henka'a kazeri haviza hugahie. ²²Arimpama ahe vahemo ha'ma hu'zana eri agafa nehie. Hagi ame huno rimpa ahe vahe'mo'a, rama'a kumi nehie. ²³Zamavufga eri antesga hu vahe'mo'za evuramigahaze. Hianagi zamavufgama anteramiza mani vahe'mo'za, ra zamagi erigahaze. ²⁴Kumzafa vahe'enema tragoteno manisimo'a, agra'a azeri haviza nehie. Keaga refakohu tratetima antahige'sankeno huamama hanige'za kana amigahaze. Hagi huamama osniana, Anumzamo'a azeri haviza hugahie. ²⁵Vahe'mofoma koroma huntesanana, kagra'a krifu anaginentane. Hianagi iza'o Ra Anumzamofonte'ma amentintima hanimofona, agu'vazinkeno knare huno manigahie. ²⁶Rama'a vahe'mo'za kva vahe zamimozama zamavesima zamantesaza zanku zmavu'zmavara nehazanagi, Ra Anumzamo refako huno nege. ²⁷Fatgo vahe'mo'za kefo vahekura zmavesra huza zmago atenezmantaze. Hianagi kefo vahe'mo'za, fatgo zmavuzmava'ene vahekura, zmavesra huza zamago'atenezmantaze.

Aguri hu'nea naneke

30 ¹Ama'na nanekea, Jake nemofo, Aguri Itielintegane Ukalintega huama huno kre zanami'nea naneke. ²Tamaga nagra mago'a vahe'mo'zama nehaza havizana agaterena havizantfa nehu'na, vahe'mozama antahi ama'ma nehazaza hu'na antahiamara nosue. ³Nagra knare antahizana rempi hu'na e'orina, Anumzamoma Ruotage hu'nemofoma keno antahinoma hu antahizana e'ori'noe. ⁴Iza monafinka mareriteno ete erami'ne? Iza zahora aza agu'safina azeri'ne? Iza tvarave'afina tina anakino ante'ne? Iza mopa ometre emetretera mikazana antegenore fore huno me'ne? Agri agi'a iza'e, nemofo agi'a iza'e? Antahinesunka nasamio! ⁵Anumzamofoma kema maka ke'za antahizama hu'nazana tamage ke me'ne. Agra mika zamagu vazinoguma Agritema neaza vahe'mokizmia hankogna hu'nenozamagu nevazie. ⁶Anumzamofoma nanekerera kagra'a kagesafintira amerasenska ruokamaro, ru kazeri korino havige vahe maninane huno kazeri ama hugahie. ⁷Anumzamoka tare zantfanku kantahige'za huanki kavresra huonanto, ama mopafi ofrina kasefa hu'na maninesurera, ⁸ese' zanku'ma kantahigesuana, nazahuge'na vahe'ma revatgahu avu'avazane havigea

osaneno. Anante'zana natrege'na rama'a feno vahera omanige, namunte omane vahera omanisuanki magoke magoke knama nesugeno namuma hania avamente namio. ⁹Na'ankure nagrama rama'azama antesuna, namefi hunegamina ru Ra Anumzamoka kagena antahina osu'noe huge, ru namunte omanena musufa nesena, kagi eri haviza huzankura, avamente namio. ¹⁰Mago kazokzo eriza nemofona kva'amofontera vunka ome azeri haviza hu kea osuo. Kagrama anama hnankeno'a, ana kazokzo eriza ne'mo'a antahi haviza hugantena, hazenkefi manigahane. ¹¹Mago'a vahe'mo'za nezmafana hu haviza hunezamante'za, nezamrerana musenkea hunozmantaze. ¹²Mago'a vahe'mo'zama antahi'zana kumitia omne'ne nehazanagi, Anumzamofa avurera agrua osu'naze. ¹³Mago'a vahe'mo'za knare hu'none huza zamavufga ra nehu'za, mago'a vahe'mokizmia zmage fenkami netraze. ¹⁴Mago'a vahe'mokizmi zamavemo'a, vahe'ma zamahe bainati kazinkna higeno, tuke zmavemo'a kazinkna huno asaneneankino zamunte omane vahe ene, mago'a zanku'ma upama hu'nesnaza vahera, ama mopafintira zamasga huvazigahaze. ¹⁵Kukufamo'a taremotatre znante'ne. Zanagi'a, Namio, Namiok! Zmavesizama eriknarema nosia zana 3'a za me'ne. Zmamuma nosia zana 4'a za me'neankino, ¹⁶e'i anazantamina, fri vahe kumaki, venema mase a'mo'ma mofavrema nontea naravo aki, tima anihuma nehia hagege mopagi, ke'onke zama tefananema nehia tevemofonena zamura nosie. ¹⁷Nefama negeno azanava kema hunenteno, nererama kefenkami atresnia vahe'mofo avurga, kotkoti nama zgamo'za ana avurga ani kasonepesageno, tumpa namamo'za avufga nevgaregahaze. ¹⁸Nagritera 3'a zamo ruzahukna zana megeno, antahi ama'ma nosua zana 4'a zana me'ne. ¹⁹E'i anazana ina kante tumpamo'a monafina hareno nevie, ina kante osifavemo'a have agofetura regraroheno vanoa nehie. Ina kante ventemo'a, tusi'a hagerimpina vano nehie. Hagi na'a hu'nea zanku venenemo'za, vene omase akura zamavenesie.

²⁰Savri a'mofo avu'avamo'a amanahu hu'ne, venema maseteno'a, ne'za neteno agiteti eri ho'mu hiankna nehuno, kefo zana osu'noe nehie. ²¹3'a zamo ama mopamofona azeri tore nehanigeno, 4'a zamo rga oregosie. ²²E'i kazokzo eri'za ne'mo'ma kini mani'zane, neginagi antahizane vahe'mo'za nezama nezamuma hu'zane, ²³ave'sinontaza a'mo'ma ve'ma eri'zane, kazokzo eri'za a'mo'ma kva'ama maninesia a'mofo ve'ama rehanareno manizamo'a, ama mopa azeri tore nehie.

²⁴Ama'na mopafina 4'a onensa zgaramina mani'nazanagi, knare antintahimo'a, zamagripina avitene. ²⁵Kipzuvemofona hanave zmimo'a osi hu'neanagi, ko knafima nesagura ne'zana zgegnafi eritru nehaze. ²⁶Krofamofona hanavezmia omne'neanagi, havefi nozmia negize. ²⁷Kenumofona kini vahe'zamia omni'neanagi, sondia vahe'mo'zama hazaza hu'za, vugota huza nevazageno, ana amage amage hu'za

nevaze. ²⁸Tagovira kazanteti amne fru hunka azeriga zgamo'agi, kini vahe'mokizmi marerisa nompina ufregahaze.

²⁹3'a zgamo'za knare huza kana nevazagena kenasane nehuanagi, 4'a zgamoza fatgo hu'za nevazagena negoe. ³⁰E'i ana zga laionigino mika zgamofona hanave'amo'a zmagatere'neankino, mago zgagura korora huno manigane ozamantegahie. ³¹Ve kokoremoza zmahihiza eri antesga hu'za vazageno, ve memeki afumo'za zmasenia eri antesga hu'za vazankna huno, kini ne'mo'ma sondia vahe'anema nevuno'a, ana nehie. ³²Kagrama neginagi kavukavama hunka kavufa ra nehunka, kefo avu'avama hu antahizama retro'ma nehanunka, kanzu kagite refintanka kea osuo. ³³Mememfo amirima tatizana bata tronehaze. Hagi kagona ru hapati'sazana, kora hugahie. E'ina hu'negu arimpama ahezamo'a, ha' eri fore nehie.

Kini ne' Lemuel hu'nea naneke

31 ¹Ama'na nanekea, kini ne' Lemuelina nerera knare antahintahi ami ke rempi humi'ne. ²Nagrani'a narimpafinti'ma kasegante'noa mofavre'nimoke, Ra Anumzamofonte huvempa hugeno nami'nea mofavre mani'nane. ³Hanave ka'a a'nerera hunka otro. E'inahu a'nemo'za kini vahe'ma zamazeri havizama nehaza a'nerera osuo. ⁴Lemueliga kini vahe'mo'za aka tina onesageno, kva vahe'mo'za hanave tima nezankura zamavesi zamavesi osugahaze. ⁵Na'ankure aka tima nesuza kasegemofona zamage'nekaniza zamunte omane vahera zamazeri so'e osugahaze. ⁶Aka tina fri'zama nehanaza vahe nezamita, waini tina ra hazenkefima mani'naza vahe zaminke'za neho. ⁷Zmatrenke'za aka tina nene'za, zamunte omnea zanku'ene, ra knazama eri'naza zankura zmagekaniho. ⁸Kema hugama osu'nesia vahe'mokizmima, trate'ma zamavrente'za zmazeri havizama nehanageta, kea hutma zamaza hiho. ⁹Zamunte'ma omane vahe'ene, zamagra'ama zamaza hugama osanaza vahe'mokizmi knarezankura, fatgo huza refkoma huzmantesaza zankura keaga hunka zamaza hugahane.

Knare antahizane anemofu naneke

¹⁰Izaga knare avu'ava ene ara erigahane? Na'ankure e'inahukna a'mo'a, zago'amo marerisa havea agaterene. ¹¹Neve'a ana a'mofonkura makazana hugahie huno antahinemi'ankino, mago zankura upara osugahie. ¹²Mika zupa nomni'zama'afina, ana a'mo'a, knare zanke'za nevena hunenteno, azeri havizana osugahie. ¹³Ana a'mo'a muse nehuno sipisipi azoka ene nofi'ene hakeno erino nofi zagiteno, agra'a azanu kukena hatino tro nehie. ¹⁴Ana a'mo'a ventemo'za zagore atre feno eri avitete'za neazankna huno, afetetira nezana erino noma'afina egahie. ¹⁵Agra masa osu'nesigeno nanterampi otino nevene, noma'afi naga'amofu nezana retro

nehuno, eri'za mofamo'ma erizama emerisia zana retro huntegahie. ¹⁶Ana a'mo'a hozama ante mopa rezagneno keteno, agra'a eri'nesia zagoreti mizaseno waini hoza antegahie. ¹⁷Ana a'mo'a hanavetino eri'zana eri a'kino, hanavetino erizana erigahie. ¹⁸Ana a'mo'a zgoma erifore'ma hu eri'za eri kaziga knare hu'neanakino, tavira rekru hunteno erizana e'nerinkeno kenage segahie. ¹⁹Ana a'mo'a agra'a, azanuti nofira zagino kukena hatino tro nehie.

²⁰Agra zamunte omane vahera zamaza nehuno, mago'a zanku'ma upama haza vahera zamaza nehie.

²¹Ana a'mo'a zasi koma atanigeno'a, noma'afima nemaniza naga'amo'zama zasiku'ma fri'zankura, korora osugahie. Na'ankure amuhoma hu tavravereti hatino kukena huzamantene. ²²Agra tafe'ma masi tafera hatino tafera nehuno, zgo'amo mareri efeke ene fitunke tavravereti kukena hugahie.

²³Rankumamofa kafantema ranra vahe'mo'zama atru huza kegagama nehazafina, ana a'mofa nevena antahimiza ke'za antahiza hu'naza nere. ²⁴Mika zupa ana a'mo'a knare kukena nehatino, zamu'nofira tro nehige'za feno vahe'mo'za eme mizase'naze. ²⁵Agra hanave'areti'ene ra agima amizanteti kukena hiankna nehuno, henkama esia zankura kiza regahie.

²⁶Ana a'mo'a ama' antahizanteti kea nehigeno, agipina vahe'mofoma knare kema hunte kemo avite'ne.

²⁷Arga mika'zama noma'afima me'nea zantamina kegva hu so'e nehuno, ferura nomanie.

²⁸Mofavre zga'amo'za hu muse hunentesageno, neve'a husga huntegahie. ²⁹Rama'a a'nemo'za knare avu'avara nehazanagi, kagra zmagaterenka hiranto a'tfa mani'nane.

³⁰Mago a'mo'ma fru huno knare avu'avama haniazamo'a krevatga hanigeno, agi agonama keganunuma hananazamo'a, fanane hugahie. Hianagi Ra Anumzamofoma koro hunteno agorgama nemanisia a'mofona, husga huntegahaze. ³¹Agrama eri'zama eri'nesia avamente mizana neminkeno, knare avu'avama nehuno, knare eri'zama eri'nesia zankura, vahe'mo'za ra kumamofa kafante husga huntegahaze.